



SEPTEMBER 2024

VOLUME 64 | NO. 09

Christian Thukizakna



VENG-LE-PAM TOH KIPUMKHATNA

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndoulia

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

Design & Setting

Upa Khuplajem Guite

LAKMAN:

Kum khat ₹ 150.00

Dak ah ₹ 200.00

Bu khat ₹ 15.00

CONTENTS

1. EDITORIAL	: 01
2. VENG LEH PAM TOH KIPUMKHATNA	: 03
3. KIPUMKHATNA	: 06
4. MIMAL MISSION NASEPNA THEIHCHETNA	: 11
5. BANG HANG HIAM TOUPA AW; BANG HANG HI HIAM	: 16
6. BIBLE STUDY	: 22
7. GAMMIAL AW	: 26
8. DORCAS CORNER	: 31
9. YOUTH CORNER	: 34
10. THU TUAMTUAM	: 36
11. ORDAIN SUNNA	: 38
12. KIPATHU GENNA LEH THUMNA DINGTE	: 39

Thusuah ding piakna:

Editor,
Khristian Thukizakna
Dorcass Hall, P. O. Box - 6,
New Lamka,
Manipur - 795006, India.

*Thusuah sung-a kigente
Evangelical Baptist Convention
Saptuam ngaihdan a hikim kholkei.
Thusuahte'n amau thusuah ah moh a
pawtek ding uh.*

VENG-LE-PAM KIPUMKHATNA

⁸Ki-ittuahna lou ngal kuamah bangmah ba kei un; amau mihinpih itpa'n dan a zuikimta hi. ⁹Hiaite, "Ang kawm ke'n, Tualthat ke'n, Gu ke'n, Eng ke'n," chih leh thupiak dang omlai himhimte, "Nangmah na ki-it bang in na invengte na it ding ahi," chih in a khaikhawm vek hi (Rome-te 13:8,9).

Tukum i thupi uh "Kipumkhatna" a tuamtuam in sehkhen mah lehang kipumkhatna ding aziak, alampi, a pianzia leh a kingakna a kibang vek ahi. Nam kipumkhatna a tuam, veng-le-pam kipumkhatna a tuam, inkuan kipumkhatna a tuam chihbang om ngeilou hi. Huchi bangmah in kipumkhatna daltu leh susetu koipeuh ah a kibang a, huai tuh khelhna ahi (hiaipen amun leh a field zilin thil diklou, deihsaktuam neihna, kinelhsiahna, diktatlouhna, nekgukna, hiamgamna, chiin min tuamtuam kivuah mahleh Bible gendan in khelhna a hivek hi). Insung kipumkhatna hihsetu khelhna ahi a, veng-le-pam (khosung) kipumkhatna daltu leng khelhna mah ahi, nam leh gam kipumkhatna daltu leng khelhna mah ahi (Pau 14:34). Nam khat sung a kipumkhatna a omna dingin politics dik angai akichi sek a, himahleh politics diklou saktu tuh khelhna mah ahi zel hi. Khotang kipumkhatna dingin leng diktatna, thudik a vaisaina, itna toh ki-etkolna chihte apoimoh ichi a huaite daltu khelhna mah ahi zel hi.

Leitung khelhna a puksa ahihman in mihing kivaipuakna peuhmah hoihbukim a om ngeikei ding hi. Hiai theisiamlou makai hiam mi nautang hiam hihkhak ding pilvanhuai mahmah hi. Aziakbel, ahoihpen deihluat man a thil tengteng soiseltu a pang den, eile bangpi hilou khat, midang mohsaden, atawp chianga lungkia in bangmah a zattak lou suah theih ahi. Alangkhat ah Leitung pen ahoihlou ding mah ahi chi a thilteng ahoih hiin ahoihlou hileh pomzam suk vek khak ding a lauhhuai zel hi. Mihing hatna a kilemna leh kipumkhatna bawlkhiak vual ahikei chih theiin Pathian in Jesu Khrist ah kilemna lampi hon bawlkhia hi. Atom in gen leng Jesu kilemna lampi bawl tuh: Kingaihniamna lampi,

migitna lampi, thuakhatna lampi, khat leh khat kithuakzohna lampi, leh ki-itna lampi ahi (Phil 2:4-11; Eph 4:2).

Kipumkhat ding chih thu aneu alian in i gen' souhsouh laiin kipumkhatna aom hiam chih i dotma in kipumkhatna ding lampi Jesu Khrist in a hon bawlsak i zui uhiam chih kidot masak ding ahi. A lampi tawn loupi a kipumkhatna hong piang ding i sak leh khovel a thil haihuai pente laka khat hiding ahi. Buh chi i tuh leh buh ki-at hi, vaimim chi i tuh leh vaimin ki-at hi. Haitang tuh a sekkhum hong pou dia lamet pen mahni kikhemna lel ahi ding hi. Insung a zu-le-sa ne a ut-le-dah a khosa, inkuan nuamtak hongpiang ding a lam-et tuh mahni kikhemna ahi.

Kipumkhatna kichi bawlkhiak ngai, sepkhia ngai, zun ngai, khi ngai ahi a, amah a hong piang khemawk thil hilou ahi. Veng-le-pam kipumkhatna eilam context deuh in en leng i muh ding tampi om hi. Etsakna dingin: Insung ah Pa in kei thu naman ding uh chi henla pa mohpuakna lalou in insung vai kichian om ngeikei leh, intek nu thildang a buai den, tate'n amau lampi tuam chiat zui hitale uh chikchiang hiam a tua insung hong buaizak ding pen a lamdang hipeuhmahlou ding hi. Bangziakin, na zuih leh, a lampi tawnkhalou uh hiven! Akisiat nung chianga hanhat thoh, kinak thoh hiam, nupa kikhen thoh, rehabilitation, police chihte zaw chihmoh vai hita ahi.

I thupi uh veng-le-pam himahleh insung etsakna in i la hi, aziakbel kipumkhatna lampi tawnkhalou insung apan khangkhia heutunu heutupate'n veng-le-pam kipumkhat hon bawl khiak guih ding uh lametna tamlou hi. Veng khanglam a tangkhameh kha salua khokhung lam ah tawitou in vane lechin kha thouthou ding ahi. Huaiziakin, Bible in "Apaina ding lampi ah naupang chil in" achih pen thu neu hilou hi (Pau 22:6). Veng-le-pam kipumkhatna a pian theihna dingin insung a akipat ngai ahi. Tulai khovel ah insung leng giahna hotel bang lel tamta, i khuate uh leng kigalkep, skulte leng kigalkai, khaloh nei a nna bel sem khollou kitamta. Hiaite bawldik masaloupi a gam nuam leh gam hoih asung a kipumkhatna om hong piang khe ding chih Bible thugen gingtate a dingin gintak haksa hi. Jesu Toupa a nei Amah lampi tawn a kalsuante hiding in Toupa'n hon siamthak ta hen (Is 9:6; Lk 2:11). ■

VENG LEH PAM TOH KIPUMKHATNA

- Pastor G. Khankham, *EBCC Thingkangphai*

Mihingte tuh khat kia a khosa, khat kia a teng leh khat kia a nungta zat ihi kei ua, a hon a kipawlkhawm, khosakhawm leh nungtakhawmte i hi uhi. Inn bang zahzah hiam tengkhawm in khaw khat hong piang hi. Hiai bang a tengkhawmte lak a inn kinai deuhte, insakte, inkhangte, inkongte leh phaitamte chi in inveng min kiphuak tiltel hi. Insak inkhang a kinei a, khosung khat a tengkhawmte tuh tanau, beh leh phung a kinai hikeimah leng, i dam leh i nat, i nop i dah a, a kiphawk, poimoh hun a kidelh leh kipanpihte i hi uh. Gamlapi a om u leh naute toh kikawmtuah bat louh hun a leng insak, inkhang, veng leh pam toh kikemtuahte i hi uh. Tuaban ah, saptuam leh khotang pansan mah a kithuahkhawm leh kikemte leng ihi uhi. Hiaite toh kituak lou, kikawm lou, nat leh sat, a nuam a haksa kitheihpihtuah lou a om louh di ahi.



Tukum 2024 a thupi “KIPUMKHATNA” sung a September kha a thupi “Veng leh pam toh kipumkhatna” chih pen hiai bang in enkhawm, kikumkhawm in houlimkhawm leng chi in ka hon luikhia hi:

ITNA A KIPUMKHATNA: Nang na ki-it bang in na invengte na it ding ahi (Lev.19:18c). Hiai thu tuh sawltak Paul in Rome khopi a om saptuamte a laai khakna ah leng hon gelh tel nawn hi (Rom. 13:9). Ngetna ahi kei a, thupiak (Command) ahihman in zuih teitei ding, kitheihmohbawl ding zat hilou hi. Mi kuapeuh a zuitute a kisik om kei ua, a hinkhua uah galmuanna, kilemna leh

kituahna om ahihman in a zui loute a eng het kei uhi. Itna sung ah kihazatna, kimuhdahna, kilemlouhna, kimullitna chihte om lou in, kideihsakna, kinekgaihna, kihehpihna leh kituahna, kilemna chihte om zaw hi. Kihazatna a nei Joseph sanggamte lak ah kimuhdahna leh kimullitna ziak a kilemlouhna om man in a deihdan leh a utdan uh kibang lou in kipumkhat thei

lou uhi. Laisiangthou a Pathian thupiak zui in eimah i ki-it bang tak in i invengte it chiat leng kilemna, muanna i lak uah om ding hi. Hon itte leh en leng i itte toh tonkhawm, houlimkhawm, sepkhawm, bawlkhawm, nekkhawm, dawnkhawm a nuama, lungsim kibang, utkibang ahihman in kipumkhat ding sawmtawm ngailou in hong om mai hi. Hiai itna a kipumkhatna a nei khua leh tui, saptuam, inkuan leh nupate tuh leitung a mi enhuai leh hampaha pente ahi uhi.

LUNGSIM A KIPUMKHATNA:
Kikhenna ding leh kithupisakna ziakin bangmah hih kei un, lungsim niam lak in michih in amah sang in midang hoihsa zaw hen. Na lak ua kuapeuh in amah a ding kia en lou in, midang a leng en sam hen (Phili.2:3-4). Lungsim niamlak, ei sang a midang hoihsa zaw in om leng midang toh kina lou ding, kisellou ding, kilai lou ding, kihaw lou ding, kimohsa lou ding, kigense lou ding, kituak leh kilem tak a om ding hang a, hong nuam mahmah ding hi. Huai Chiang a lawmte kiang bang, invengte kiang bang, inkuante kiang bang a nang na pil, nang na fel,

nang toh omkhawm a nuam chi leng amau zong hon mudah het lou ding ua, kipumkhatna hong om dia inkuan, saptuam leh khotang hong nuam dia, igam in vualzawlina hon dong dia, singkung loupate, zu leh vate hong bit ding ua, guam sung a luitate apan tuisiang sel sel, limchitak, vot vengvengte hong luang ding a, kichidam mahmah dia itha hong hat dia, boruak nuam tak in ankam hon sulim dia, i nek i dawn uh hong hoih leh melhoih leh vun mam hiuhiau a om ding hihang. Huai tengteng nang leh ken i neihsa, i zat nai louh man hilel, zangta ni.

THUTAK LEH GIN-OMNA A KIPUMKHATNA: Insakin khang tenpih invengte, niteng a kipawlpah lawm leh vual banah seppih leh nekzonpihte tung ah thutak gen in i gin-omna hia? Mi khenkhat lungsim thuah nei doha hau leh ngian nei mahmah ki-om hi. Khenkhat leuleu lah a zak bangbang uh, a muh bangbang uh sit om lou, im omlou a genkhe gaivek chih leng ki-om hi. Kibanglou taktakten ei hihnate thunun in midang a dia nuam lou dingte paihkhia in thutak leh ginomna ah kipumkhat leng, mi thutakte

mi'n muang, mi gin-omte muantak kisa chiat ahihman in kipumkhatna haksa lou ding hi. Numei leh naupang nangawn pangkhawm a hong kipumkhat Chiang un, a nung i zuih uh Jesu Khrist mel a hong lang dia, Pathian Khasiangthou zang in kipumkhatna chidam tak a kankhawm in i om thei vek ding uhi.

KHOSAKNA

A

KIPUMKHATNA:

Kibang

lou leh kikim lou ngen khosakhawm, kuapeuh kipoimoh chiat leh kiphatuam tuah chiat dingte ihi uhi. Thagum zang a nekzong, pilna zang a nek zong pawl, siamna zang a nekzong leh khosate ngen ihi uh. Huaite mah khat vang a khat in a taksap leh poimohte nei thei, mu thei ngah thei, thahatna a poimohna muntak a kizat Chiang in phatuam petmah a, lemtheihna in tawldam tak leh hun sawt lou kal a thil tampi hon zou sak thei. Insak, inkhang, kim leh kiang toh kipumkhat a pankhawm siam leng khosung, vengsung nuam ding, chidam ding, khangtoug masawn ding. Kithutuak lou, kingeih lou, kipumkhat thei lou, kilang pan leng minsiatna,

lohsapna, niamkiakna leh puksiatna hong tung ding hi, huailah kuapeuh in i deiham leh utlam uh hilou chiat ding hi. Ut lou in deih kei mah leng kituah i sawm louh a kipumkhat i sawm kei uleh insak inkhang, khua leh tui, niamkiak haihiaid ding hang a miten hon nuaisiah ding uhi. Pilna neite pilna, hatna neite hatna, siamna neite siamna, ahaute hauhna sungkhawm in kim leh kiang toh khut kilen in mapangkhawm leng Toupa vualzawl na i tang ngei ding uhi.

BIAKNA A KIPUMKHATNA:

Khosung mite i kigen Chiang in dawibia, milimbia, singbul suangbul bia, ni kha leh aksite a bia kuamah i om nawn kei uhi. Jesu nungzui Khristian, gingtu ngen, gan sisan, lou leh ai zang a siampu in hon thoih leh hon mut kuamah i om nawn kei uhi. Himahleh Khristian i suah tung lai ua gin-omna leh muanhuaina bangbang tulai a nei zou nawn lou ihi hiam chih kivel tuak mahmah hi. Pathian thu a salhvak a i omna, Pathian thu a khalam damna leh salam hindan kikhekna i tante lunggel thak zel tuak tampi om hi. Sihnung Chiang a tunna ding leng a mun kibang, Pathian

thuawilou teng gawtmun a kintak a paikhawm ding, Piangthak gingtu, Jesu nungzui muanhuai teng vangam a Pathian kiang tun sawm ngen leng hilai ihi uh. Jesu loungal lampi dang omlou ahihman in Khrist ah pumkhat suak in vangam lampi paikawm in, Toupa hoihna, hon itna thu kikum in houlimkhawm leng nuam sem ding hi.

THUKHITNA: Kingaihniamna leh nunnemna tengteng toh,

dohzohna tengteng toh, itna in kithuakzoutuah chiat unla, itna khauhual a kankhawm a om in kha a kipumkhatna lenkip tinten ding in kihanchiam un (Eph.4:2,3 Paral) Hiai a thumal kigente michih nupi, papi, nungak, tangval, a tek a khang in thei in zui chiat leng tuh inkuan i kipumkhat ding ua, khua leh veng kipumkhat in, kim leh kiang toh zong kipumkhat in, kipumkhat nopna leh vualzawlana i tang chiat ding uhi. ■

KIPUMKHATNA

- Pastor L. Siamlalmuan, *Khajang Area Pastor*

Thumasa: Tukum i thupi “Kipumkhatna” thupi poimoh tak ahi a, hiai pansan in thugen tampi i na zata ding ua, laigelh bangzah hiam leng i na sim tham ta ding uhi. Tu’n leng huai mah thupi a nei in kikum laile i chi hi. Kum 1966 in Ron Karenga in Kipumkhatna nou (Unity cup) chih a hon pankhia hi. Huai in a tup ahihleh Africa-American kal ahoih semna ding leh Africa te tawndan leh paidan kepbitna ding ahi. A min ding in Kwanzaa a chi ua, December 26th apan January 01st tan a zang zel uhi. Africa miteng in a zatzel uh ahi a, Africa-te sahkua tuamtuam zui Muslims, Christians, Black Jews, Buddhists, Hindus chihte himahle’ uh khentuam omlou in huai ni tuh a zangkawm zel uhi. Kipumkhatna i chih in khentuam omlou a, a vek a kibang hihna leh kituahna hon pia ahi chihna ahi. Huchi ahihlai in, khovel mite kipumkhatna a gen uh leh gingtute kipumkhatna gen pen kibang hetlou ahi chih i chiansem poimoh hi. Khovel mite kipumkhatna gen tuh a hun a ni a kipumkhat ahi a, gingtute kipumkhatna gen pen ahun leh ni vuak hilou in, huai toh tengkhawm, hingkhawm,

neihthoh ahi. Huaiziak in a detdou kipumkhatna a om theihna ding, alampi omsun Lemna Kha leh Khrist sapum a Kipumkhatna pomkip, apoimoh pen ahi. Huai mah bulsut a nei in i sutsuk ding.

1. Bang ziak a Sawltak Paul in Lemna Kha a kipumkhatna sinsak ahi dia? Kum zabi nihna (2nd Century AD) in Rome Kumpi vaihawmna gamsung a bik in Ephesa khopi ah tawndan leh paidan kigamla mahmah ngen tengkhawm uhi (Etsakna: Jews, Greeks, Romans, Asians). Sahkhua lamah sabiakna tuamchiat zui a hilai uhi. Khotang vai ah kideidanna a lian a, mihausa kumlui, sumsinmi, hausazat (aristocrat) leh minautang chi'n a kikhen diudeu uhi. Greco-Roman Society bang ah salmat-mi (slave) leh zalen-mi (Free man) chih bang om in, numeite bangmah a muhlouhna, khotang vai a simmohna a lian mahmah hi. Huchi'n hunte hongpai zel in Rome vaihawmna gamsung ah gingtu hong khang semsem in, Tanchinhoih ziak in sahkhua ah kideidannate ahong bei hiaihiai a, Juda sahkhua zui Judate leh sabiakna dang zuite (Zentelte) Tanchinhoih ziak in Pathian khat a bekhawm theita uhi. Amah tuh i kilemna ahi ngal a; ama'n ei nihte tuh khat a siam in i kikal a kimelmakna

banglai tuh a hihchimta (Eph.2:14). Huaibanah, khotang vaihawmna leh kivaipuakna ah kideidanna a om nawn kei a, salmat mi leh zelen mi chih leng a om nawn kei a, numeite nelhsiahna leh bangmahlou a ngaihna teng a hong bei a, saptuam kilamtouhna ah numeite khuam poimohtak ahong hiban uhi.

Huchi'n hun bangtan hiam zoh in, saptuam naupang lolai banah tengpolh lua ahihman un, ahun sawt dungzui in kituahlouhna leh kingeihlouhna hong om panpan a, Judaten amau sabiakna toh kisai a koihkhiak theihlouh uh a om a, huaite gingtute'n a zuihpil ding un a ngiat uhi. Khotang vai ah hundang a paidan omsate mangngilhlo in amau a chiat zuih a hon sawm chiang un, kituahlouhna hong om a, huai in saptuam sung leng naktak in ahon sukha hi. Saptuam sung a buaina piangsakte a hihleh:

i) A sunglam apan: Judate leh Zentelte kikal a kitheihsiamlouhna uang,

Pathian thu ah pomdan kibang thei nawnlou, khotang leh khosakna vai ah kipawl henna.

ii) A polam apan: Rome vaihawmna nuai ah gingtute gelgotna uang semsem, gingtuten Juda heutute apan huatna leh gal bawlna tuak, akim akiang ua milim bemite apan khemna tuak. Hichi bang hun haksatak lakah Sawltak Paul in gingtute kigawm kik theihna ding lampi omsun khat kia a om a huai tuh Lemna Kha a kipumkhatna vom tinten ding in (Eph.4:3) a chi hi. Judate Pathian khat kia ahi chi in, huai tungtawn a kipumkhatte ahi ua, huai bang in gingtu tengteng (Juda, Zentel) Jesu Khrist a Kha khat tangten kibatna huai ah kinei ahi. Polam kilatna chi-le-kuang, tawndan leh paidanten hon gawmkhawm lou dia, huaite enlou in kha a kibatna pen en zaw ding in Paul in a hasuan hi. Huai mah gingtuten i poimoh pen ahi a, i kibatlouhnate sutsut a, ei paidan midangte zui dia hasuan sang in akibang gingtuten i tan Lemna Kha pen kembit chiat dia kiasuan ding ahi. Kipumkhatna i chih gingtute a ding in bawlkhiaik ding, lamkhiaik ding chih

ahikei a, a omsa huai kepbit ding chih ahi zaw. Huai ziaik in kipumkhatna i chih khovel miten lamkhiaik asawm ua, gingtute a ding in a omsa ahi a, i neihsa huai kepbit ding ahi. Huaimah ahi, Sawltak Paul in hunkhat lai a, Ama'n ei nihte tuh khat a siam in i kikal a kimelmakna banglai tuh a hihchimta a chih, huai a Lemna Kha pen kembit thak dia hasuan chihna ahi.

ii. Kipumkhatna dengdel saktu: Laiiangthou ah kipawlkhenna leh sinsakna dikloute genna heretic a kichi a, huaituh Pawlpi ngaihdan toh kikalh gindan nei mi (Paite Dictionary version 1.1.4.7), chihna ahi. Himahleh a thumal kilakkhiatna Thukhun Thak ah heresy i chih Greek kammal hoihtak a i sut leh tel (to choose) chi'n a kilet thei hi. Mikhat thikthusetak a amah lam a pang dia mi a zot a, huai in kikhenna leh kituahlouhna a chituh pen genna ahi. Huchi bang a hong om chiang in "Nou/Kou" chihte ahong kizang a, huai hun chiang in midang ngaihdan toh kikalh ngaihdan nei a hong tamta chihna ahi. Hiai in kipumkhatna a dengdelsak a gindan diklou

sang in leng buaina lianzaw a tun thei hi. Huchibang a hong om Chiang in buaina sukveng sang in, a uang zaw lam ah apai ut zosop a, huai hun in, buaina sukvengna ding in thagum a kilemna bawl in leng kipumkhatna detdou a bawlzou kei hi. Kizepna kibat zia, chi-le-kuang a kibatna chihnten kipumkhatna taktak a bawlkhe thei kei. Mimalmal a i hihna chiat a kideihkhop luatna in leng kipumkhatna a dengdelsak a, mi toh kituaktak in ahon tonkhawm sak thei kei hi. Polam kilatna ten kipumkhatna a dengdelsak a, huai polam kilatnate tungtawn mah in kipumkhatna bawlkhiat zoh ahi ngeikei ding hi. Kipumkhatna dik i chih Khasiangthou apan ahi a, huai in kideidanna himhim omlou in gingtute a sungluah hi. Huaiziak mah in, kipumkhatna i chih gingtute a ding in, i bawlkhiak ding chih hilou in, a omsa kepbit ding ahi. Huai ah tuh Juda mi a om thei kei a, Grik mi leng a om thei kei; huai ah tuh bawi a om thei kei a, bawilou leng a om thei kei; huai ah tuh pasal leh numei leng a om thei kei hi. Khrist

Jesu ah na vek un pumkhat na hi ngal ua (Gal.3:28).

III. Khrist sapum a kipumkhatna lamtou:

Kipumkhatnaichihthulam dang lua ahi kei: i) Pathian apan thawnpiak ahi. ii) Kha gah ahi a, gingtute pichinna tehna ahi. iii) Khovel in ahon theihtheihna ding ahi. iv) Gingtute thahatna leh thilhihtheihna nak ahi. Amah a kipan pumpi tengteng kizopna chiteng sep zia a lemtak a suktuah leh kizomkhawm a, hiang chih in sep ding dan bang a a sep Chiang in pumpi a khang a itna ah amah leh amah a kilamtou hi. (Eph.4:16). Gingu tengteng Jesu Khrist zia a sapum khat hi ding a, Kha a baptist lut a omte ihi uhi. Huai in gingu i muhtheih, i biakkhawmpihte kia gen hilou in, mundang, gamdang a om gingu chikmah aleng i muh ngeilouhte tanpha uap ban a kibatna nei ihi chihna ahi. Polam kilatnaten Saptuam (Khrist sapum) a lamtou kei dia, himahleh i sung a om Kha in a lamtou zaw ding hi. Huaiziak in polam kilatnate a ki-enlou in sunglam a pen in ki-en lehang huai ah kituahna leh pumkhat hihna hong dawk ding ahi.

Sapum in khut, khe, mit, bil, nak leh adangdang a nei a, huaite a zatna tuamchiat ahi. Khe in mit ka ut chilehleng a hithei tuankei dia, khe a hihna ah lungkim in a zatna di bang tak ah kizang leh mit kalsuan theilou ahihman in muhna tan kalsuan saktu ding in apoimoh hi (1Kor. 12:21-22). Rome-te vaihawm hunlai in, nam niam mahmah Plebeians nam ten, khotang a kibang hihna leh nam sangte bawl dante lungkimlou in, helna ahon pan dek ua, huai hun in Kumpi Agrippa in, “noute nam sangte a dia a gilpi chia lel na hi ua, himahleh na poimohna uh kibang ahi. Gil omlou in pumpi in na asemzou kei ding, huchimah bang in, nam sangte toh na poimohna uh kibang ahi. Kizangtuah zaw un kipumkhat zaw un” ava chi a, huai ziak in helna huaiselua a bawl kei ua, hun bangtan hiam zoh in hamphatna chituamtak bawlsak in a om uhi.

Kha a baptist lut a om gingtute Pathian in khalam ah ei hihtheih ding chiat a kilang khe thei ding a honpiak aom a, huaite a hunhun a i zat chiang in Khrist sapum lamtohna ah i pangkha a huai in muhtheih kipumkhatna hon tungding

ding ahi. Khenkhatte thugenmi, sawltak hiding, panpihtheihna, vaihawm mi, hihdamtheihna chihte piak in i om a, ihihna chiat a hunhun a ei a i zat chiang in Khrist sapum lamtou kihi ahi. Panpihtheihna nei mi in khalam a kalsuan theihna ding in thugenmi thugen a zak apoimoh a, thugenmi in panpihtheihna nei pen panpihna a piak tungtawn in khalam kalsuanna a sinkhe thei, gingtute lak ah kituahlouhna ahong om leh vaihawm siamna nei mi kilemna palai ahong hi ding a, kituahna leh kitheihsiamna ahon tungding ding hi (1Kor. 12:27-31). Huchi bang a, khalam thilpiak i neihte zatkhiak a hong hih chiang in, kingaihniamna leh zaidamna, dohzohna leh kitheihsiamna, kingaihdamna leh kilemna a hong om ding a, Jesu Khrist sinsaknate taklat semsem a hong hi dia, tup kibang leh sepnop kibang in i pangkhawm thei ding uhi. Huaiziak in, i hihtheihna chiat zangkha in huai in Khrist sapum lamtou lehang kipumkhatna a hong lang semsem ding a, huai tungtawn mah in khotang leh gamsung ah muh theih in a hong langkhe ding hi.

Thukhitna: I pu i pate'n "Hun paisa suisui kei ni, nam a tual leh i sui a hi ven" a chih bang deuh un, hun paisa leh polam kilatnate suisui louh ding ahi, gingu ihihna bel sui zel ding ahi, kipumkhatna lampi i tot theihna ding in. "Pankhawm hatna" i chih bang leng khentuam neilou a sepkhawmna ahi a, a hat deuh te, kisaput deuh te vuak teltuam chihna hilou in, a om teng pangkhawm ni, semkhawm ni chihna ahi. Paul-le-ham, mel-le-puam, tawndan leh paidan kibang teng kipumkhat ding, midangten ei

paidan hon zuih ua leh amau toh kipumkhat thei ding chih i Laisiangthou hon sinsakna dan hi ngeilou ahi. Huai naksang in Kha khat na neih pen uh pansan in khat hi un, chih ahi a, huai "Lemna Kha i sung a om pen ken leng ka kemit dia nang leng kemit in aw" chih theihna ahi a hon sinsak. Huai Lemna Kha kemit tute i hihvek theih chiang in ahi kipumkhatna taktak ahong pichin ding. Huai ding in gingu tengteng in mohpuakna nei i hi. Toupa'n Lemna Kha a Kipumkhatna vomtinten ding in hon vualzawl chiat hen. ■

MIMAL MISSION NASEPNA THEIHCHETNA

Text: Mathai 28:16-20; Romte 15:20-21; I Thess.5:11

- Upa T Paukhansiam, Missions Co-ordinator, EBC

Thupatna: Thumal, "Missions" kichi, Latin pau, "Missio" sawl chih a kipan hong kilakhia ahi. Sappau ah, tup leh ngim, hihding, sepding nna khat genna in kizangthei hi. Hiaillam sau genlou in, missions kichi, nna poimoh, Saptuam in pellou a aseping leh mohpuakna ahildan leh missions nasep Pathian lungkimna, gam-le-nam damna banah, vualzawl na ahildan enkhawm leng chi ihi.

1. EBC Missions Policy Statement:

A. Vision: Jesu thupiak thupi sepkhiakna ding a Tanchinhoih gen a, amah khe a dingthei

Missionary Saptuam Mission Fieldte a phuhkhiak ding chih ahi.

B. Missions: Saptuamte missions a kihel ding, field

thak zong ding, thumtu ding, thilpiak peding leh a kuankhe ding zong a, saptuam bing leh partnership hihhat ding.

C. Core Value: Missions nasepna ah Khamangthangte Jesu Khrist kianga pisang a poimohzaw thildang a omkei chih ka gingtona uhi.

2. Missions theihchetna:

i. Thumal genchetna: Missions a kichih Chiang in, a gentu zil a thil tuam tuam kawkthei thumal ahi. Himahleh, i Laisiangthou toh kituak a i et Chiang in, missions kichi Saptuam ten Toupa thupiak gol leh poimoh zui a, mangthangte hotkhiakna nasep genna ahi. Mikhial, mangthang, Pathian toh kilemnawn na dia, khelhna kisik a, thupha tawidia sapna leh chialna tuh mission in a gennop leh tup ahi. Ei lak leh gamdang mite lak ah hiai nna poimohtaki semthei a, hotdamna nasep ahi tuaktuak hi. Missions ichih Chiang a thil lamdangpi leh thilthak dan a ngaihtuah pah ding leng hilou hi.

ii. Hotdamna: Missions in a gennop pen mikhialte hotdamna nasep ahi. Hiai nna tuh Pathian lungsim a

om, Jesu Khrist in atak a hong sepkiak, Saptuamte tunga sepzom dinga hamphat leh mohpuakna kinga, missions ahi (Matt.28:16-20; Lk.19:10; Jn. 3:16).

iii. Pathian lungsim: Pathian tuh kuamah theihlouh a, aguk a munkhat a om maimai hilou hi. Thilsiamten A thupina a puanzak uh a tup leh deihdan ahi. Hiaibang Pathian lungsim tuh Missions kibulphuhna ichi thei hi (Jn. 1:3; Gen.1:1). Pathian in a thilsiamte nuselou in, Amah toh kisaikhak utden dan ahi. Pathian in A thilsiamte a en a, hoih asa mahmah chih i muthei hi (Gen.1:31). Huaituh thilsiamtu leh A siamte kikal ah kizopna hoihatak a om chihna ahi. Pathian a thilsiamte toh kizopna hoihatak neih a utna tuh missions kibulphuhna ahi. Hiaimah tuh tuni a eite mission leng hipah ahi.

3. Missions toh kisai a Saptuam mohpuak:

i. Missions: Missions kichi saptuam sung a mohpuakna tuamtuam omte lak a kahiang khat himailou in, Missions ziak a Saptuam om hizaw ahi chih i mangngilh louh hoih ding hi. Tua Pathian tangtawn thilgeel

semkhe dinga Saptuamte Toupa'n mohpuakna honpia hizaw hi. Khamangthang zonna leh matna sang a mohpuakna lianzaw Saptuam in neilou hi.

ii. Saptuam: Khrist a mat a om khate kipawlkhawmna, hotdam tate, Pan A Tapa a sawl bang a sawl a omte leh tua Pathian hihna theichian a be mite genna ahi (Jn 4:24; 17:18; 20:21). Missions leh Saptuam kikhen theilou hi. Sakolbakteh toh tehkak theih hi.

4. Khamangthang mantu: Piangthak khempeuh, bangchizawng hiambek a, khamangthangte mantu vanzat ahih ngeingei ding ahi. Lasak, thilpiak, kuankhiak, mite panpih, thilhoih hih, thugen, thumna, counselling leh a dang dang ah michih in poimohna leh hihtheih banghiam kineichiat hi. Toupa gam nasepna ding ah zatna bei kuamah ki omlou hi. Tunin koi ah bang ichi pankha a chih kivel leng i ut hi. Saptuam nna pipen tuh khamangthang mat ahih gige ding ahi. Hiai sang a poimoh ngaihzawk i neih khak chiang in mission nasepna niamkiak khazel

a, poi mahmah hi. Biakin hoihzaw, vanzat hoihzaw, ki vaihawmna hoihzaw, sum kichingzaw, education hoihzaw chihte leng a poimoh ngen mah ahi. Hiaite i sep lai a, i nna pi i pialsan khakding lauhuai sa ihi. Pathian in Saptuam a phuhkhiak nasan tuh, Amah beding, phatding leh khamangthangte zong a hotdamna huang a pilut ding ahi. Saptuam a kahiang khat peuhte nasep ding leng khamangthang matna hiam, ahihkeileh mite Khrist kiang a pina nasep ahih ngeingei ding ahi. Tang a tuan a Pathian in avei leh awlmoh sepsuahna ding in pawlkhat kiphutkhia a, huai tuh Saptuam ahi chih i haihlouh ding ahi. Saptuam ichih chiang in mimal kipawlkhawmna hizel hi. Huaiziakin, missions nasepna leng mimal chih mohpuak ahi chi utdan ihi.

5. Missions nasep Toupa' kipahna ahi:

i. Nam leh gam adia vualzawlna: Mission nasepna adia milip pantheihna tuam tuamte, thilpiak, thumna leh kuankhiak ahi. Atangpi in thilpiak leh akuankhe zah itaklang ta a, huntawk isa

hiam chih mimal kivel tuak isa hi. Missions nasepna Toupa kipahna kia hilou in, nam leh gam adia vualzawlna leh chidamna ahi chih i haih louh ding ahi. I nam leh gam Toupa'n honhawi liailiai lai leng mission nasepna a ina kihelkhak ziak hiding in i ngaihsun hi. Thukhunthak saptuam adin a kipan kumzabi 20 tan Toupa gam nasepna tumlam gamte makaihna ahi. Missions nasepziak a a sumsen ulehmissionsfield a mi bangzah in hinna vataan uham chih i suiseng kei ding. Himahleh a mauten suplohlu in, khovel a gam khangtou pente hongsuak uhi. Toupa lungkimna sukkhak vualzawlna in zui takpi hi. Mizogam in agam uapan mundang leh gamdang adia a piakkhiak leh thotkhiak theih omsun Tanchinhoih ahi a, hiai Tanchinhoih ziak a hiaitan a Pathian in hon laamsang ahi chi uhi. Dik ding in i ngaihtuah hi. Gam leh nam damna ding a poimohpen zaw, Pathian Mission theisiam a huai nasep mah lou thildang omlou hiveh aw! I gam leh nam humbit a i om liailiai na leng, Pathian mission sepkhiakna a kilkhak a pan ina lakkhak ziak ahidiam

chi utdan i hi. Huaiziakin, thathak lani hang in, Toupa adin a tam semseem ding in iki hanthawn hi.

2. Mallam Africa gamte a kipan sinlai: Kumzabi 7na tan ah mallam Africa, khovel a Khristian hatnapen a gen ahi. Himahleh tunin khovel a gam mialpen a chiamteh leh theih in omta hi. Morocco, Algeria, Tunisia leh Libya gamte ah Muslim 99% a chiamteh ahi. Hiai bangziak hidinghiam chih misiamten a suina uah, Khristiante gelgawtna, muhsitna leh tax sangzaw phutziak khat hi in amu uhi. Hiaite banah, Rome kumpi Constantine in Edict of Milan, 313 AD a a puan apan saptuam niamkiak ahi chipawl leng om hi. Hiaite banah, Dr Dwight Baker, Africa mallam a kum tamtak missionary vasem in saptuam niamkiakna ziak hiaibang in genbeh hi.

A. Saptuam makaiten hihkhial: Kumzabi 5&6 hunlai, Khristianna ahah mahmah lai in, saptuam makaiten Ceremony leh saptuam paidan ding kia buaipih ua, missions nasep

na ding hun pelou in, kong leng honglou uh chi hi. Tui luanglou bang hi a, a tawp in uihgawp chi hi.

B. Missionary Vision

mangsak: Antioch saptuam ten a neih uh, missionary lungput leh veina, mallam Africa saptuamten mansuah uhi. Duh-amna, angmasialna leh mahni kideihkhopna hong uang mahmah a, midangte itna hongkiam hi. St. Augustine hun, AD 354-430 in Bishop bial 700 om a, kumzabi 7 a Muslimte honglut hun in sehthum suah sehkhat kia ana omta hi.

Thukhitna: Missions nasep kichi, saptuam kuate hiam, ahihkeileh Theologian kuate hiam muhsuah hilou in, khovel piantung a kipan Pathian lungtang sunga om, Jesu Khrist tungtawn a sepkiak ahi. Tua missions mah Pathian in lamtuamtuam ah hon semkhia a, tuate Laisiangthou a ki record vek ahihman in, Laisiangthou

ahibang bang a pom Evangelical kichite a ding in kitheih mohbawl vual ding hilou hi. Huan, hiai nasepna Toupa lunglutna ahihmanin, hiai program a kihelkha nam leh gamte hampha uhi. I nam leh gam bawloih ni i chihleh, Toupa Pathian i lungkimsak masak a pellou a i sep masak ding ahi. Toupa lunglutna khamangthang mat ahingal a, huaimah tuh mission i chih hizel hi. Saptuam leh mimal a i pannate enthak leng, lungkimhuai i sa diam? A lompi a Saptuam a kikkaikhawm a Missions nna seem himah lehang, kipahman hawm hun a mimal kiang a septhaman kipeding ahihman in, mimalmalte hiai nnasepna a i kihel kul leh poimoh petmah hi. **Na muh bang in pia in, a huchih keileh Toupa'n na piak bang in hon musak kha ding hi.** Na piak bang geh a mu hilechin, na tu dinmun na tungzou diam? Toupa'n simtute hon vualzawl chiat hen. ■

KTZ July 2024 issue a Article “**KIPAK KAWM A TOUPA NASEM DINGA SAP**” chih Rev T Thangzasiem, DS Thanlon Division in a gelh ahi, issue suah hun a gelhtu min kisuah khaklough ziakin simtute leh a gelhtu in hon thehsiam i kingen hi.

BANG HANG HIAM TOUPA AW; BANG HANG HI HIAM?

- Rev. T Thangzasion, DS/Thanlon Division

THUMAPI: “Papa ang pei vang, ang zui ning” hiai thu naupang Mark Thangitlian kum3 vel mi le apa Greater Noida a Catholice naupang kepna muna a kikhakhumna aw uh ahi. Chandel district akipan anu’n asihsan nung buaina ziakin apa leh a sanggamte hong suakta thei ham uhi. Feb 16, 2024 in Noida mun a hiai patate kimuh tuh leitung adia a kimuh tawpna uh himahleh, a damlai naupangte adi’n a kah tawpna uh a hikei ding chih theihsa ahi. Naupang lungleng leh apa kikhakhumna video clip 1.43-minute lel a sawin khitui tampi a luangsak hi, a pa Aidouliankap lah July 23, 2024 nia vuikhiak a na om maimah chih media a kana mukhak in hon ihmu sak thei kei a, khitui tampi a luang hi. Hiai thu in Laisiangthou thukhunlui a jawlnei Habakuk leh Pathian kihouna hon ngaihtuah khesak lumlum sek hi. Jawlnei in Pathian vaihawm dan a en a, a mah hinkhua thiltuah teng toh enkawm vek in Pathian vaihawm tuh Fair salou a vui in, a lungkim hetkei chih kimu hi. Pathian lamlam mohsakna kampau hong paukhiak dan a kipan in, a vuilua in a vui ngoihngoih ahi chih theihtheih mai hi. Khovel ah mihing in Pathian hichi khop a aheh sanna, a salhna Habakuk laibu chihlouh koimah laibu ah kimu ngeilou ding hi. Ahia, Jawlnei Habakuk kua ahia chih atanchin tam kithei lou hi. Ei lawi laibu gelh khenkhatte bang in inkuan khangthu agelh kei a, huai beh adia khang huaizahna dante bangmah record a bawlkei hi. Himahleh Pathian nasem, Pathian leh Israelte kikal a palai semtu jawlnei ahi chih tuh chiangtak in kimu hi (1:1, 3:1). Huchiin bung thumna lavui akipan in Levi chii, tunging tumding a belseh namte laka khat hi dingin misiamten gen uhi. Hiailam thu hiai tan ah ngakhe phot leng. A laibu apan bang message muh theih a om hiam chih i enkawm ding uh:

BANG HANG HIAM TOUPA AW, BANGHANG HI HIAM?

Gentaksa bang in jawlnei tuh Pathian vaihawmna ah a vuin khasia kisa mahmah

ahi chih kimu hi. Job laibu leh Habakuk laibute apan kimu tuh ‘Bangziaka Pathian in mi diktatte thuak phal ahia?’ chih ahi. Habakuk inleng tuamah

a thehsiam zohlouh leh valh haksa asakpen ahi. Pathian mi Judate leh mi diktatten haksatna namenlou tuak ua; Alehlam a misual leh gilou pipite lohchinna a muh nawn chiang in valhhaksa sa in Pathian Fair lou asa hial hi. Khovel paidan himhim ah Pathian miten haksatna tamtak a tuahlai ua migiloute lohching lua uh, a nini a mutpuak bangmai a khang hulhul amuh chiang in. 'Toupa aw, bangtan kei kikou dinga, nang hon zalou ding na hi hiam? Hiamgamna thu ah ka kikou a non dawng nuamkei hi (1:2) achi kheta hi. 'Bang achia thulim louhna hon ensak na hia? Lohna (plundering) te, hiamgamnate, kilanna leh kinak nate ka ma ah a om ahi'(1:3) chia kikou in. Jawlnei in 'Dan leh thupiak' (law & orders) ze-awl sa, vaihawmna a kuan khe ngeikei' achi hi. Huai omzia tuh, vaihawmna bangmah kichup himhim omlou, dan leh thupiak omlou achihna tuk ahi. Huan 'vaihawmna pawtkhia omsun nangawn hekkawi in a om' (Hab 1:4) achilai hi. Jawlnei in a khasiat luatziak a Pathian question bawlkhum a hipen mai hi. Mihing lungsim apan et in zaw thehsiam louhding a

tamtel mai hi. Thugen minthang Dr PP Job in a tapa doctor zillai Michael Job migilou ten car toh 'hit and run' a a phutlup saklai un a thehsiam zoukei a, 'Why God Why? Bangham hiam, Toupa aw bang hang hi hiam?' chih lehkhabu agelh hial bangdeuh ahi. Mihing lungsim in apuak zoh nawnlouh chiang in Habakuk in banghang hiam? Toupa aw! chi ahi pen ding hi. Pathian lei leh van bawlp tuh question hour zatpih hileh kilawm in bohzui chatchat mai hi. Kum 1945 touvel in America gamah, Evangelist tuailai nih 'Chuck Templeton' leh 'Billy Graham' te hong minthang tuaktuak uhi. A maute nih lawmta hoihtak leng ahi ua, Pathian vanzat hiamtak hong hituak dingua mite lamet ahi uh. Aminthang zaw leh larzaw dinga mite lamet Templeton in a sahkhua ah ginlelhna nei in Pathian om ginglou (atheist) a hong kikhek guihmai tuh khasiat huaitak ahi. Hunkhat laiin "Life Magazine" cover ah African nupi khat kialpi thuak a om, mangbang kisa in a ta ngek pomkawm a vanlam en a daktou limlak a muh akipan Pathian aginna puksia hiin kigen hi. Bangkim hih thei Pathian ahihleh bangchidan a hiai bang

haksatna enliam maimai thei hiam? chi in a ginna a subuai hi. Jawlnei Habakuk buaina leng tuabang deuh hi in ka thei hi. Khovel ah thuakna leh haksatna, beidotna leh taksapna kichite a om mah ahi uh. Mi tamtakten bangkim hihthei Pathian in bangziak a phal hi hiam? a chikha sek uhi. Pathian phawklou mite a lohching deuhdeuh ua, inten leh neih leh lam ah khang hulhul mai ua, a nini in buk deuhdeuh uhi. Zing leh nitak antang khakkhop lek khawng amaute buaina ahikei a, Tuni koilam ah kilohna ding ka mu diam aw chih khawng a buaina uh a hikei. Bangziak a enkoltu ding omlou khop a naupang neu chikchik tamtakte nusiak a om ahi ua na chihleh hiai thu simsuk aw. Habakuk inleng Toupa aw, bangtan kei kikou ding ka hia? bangtan thulim louhna hon ensak ding na hia? lohna leh hiam gamna ka maiah a om ahi (Hab 1:1-4) chiin a kikou khe hial hi.

HON SINSAK NOP BANG AHIA? Gentaksabanginjawlnei tuh Pathian vaihawmdan ah a vui chih kimu masa hi. Dotna tuamtuam a dotzui chatchat apan a lungkim theikei chih i mu uh. A lungkim theih

louhna san tuh etdan tuam deuh in enkhawm taleng mi hoih, mi diktatte thuakna leh mi hoih loute vangphatna kikal kigamlat luatna ahi. Hab 1:2-4 a i muhbang in Pathian bangkim bawltheitu in bangchi dan a midikte haksatna a tuah uh phal ahia? chih ahi. Misual tak hi si, ei muhdan leh khotang muhdan apan teh a leng chinglou ngoihngoih i chihte dinkiak a phalzel tuh a buaihuai na laitak ahi. Pathian tuh hong kipan in Habakuk kiangah hilhchetna a bawlta hi. Kaldaite tuh zepna chiangduai dinga tungkhe phot ahihdan gen in (Hab 1:11). Pathian in Habakuk vuina leh kahna hon dawng panta tuh a theihshiam huai in, a khamuan huai mahmah hi. Habakuk in hichiin a chia 'Toupa'n kei a hondawng a, mengmuh pen gelhkhia in, suangpek ah kichian takin gelh in' achia. Huan 'mengmuh lah hun sehosa ading ahia, a zuaukei ding; omtadih mahleh, ngak in; a hongtun ding ziakin' chih thute a genzoh in, bangchi bang siatna leh haksatna maituah mahleh 'midik tuh ginna in a hingding hi' (Hab 1:4) chiin a dawngdaih mai hi. Tuni'n haksatna ziakin Pathian

lamlam na mohsa khasek hia? Habakuk laibu apan I sintheih om tuh thuakna leh haksatnate himhim bawlhohina ding ahihdan kimu thei hi. Hab 2:5 akipan simthak mah in, Pathian dawnna tuh mi hoihlou, hiai khovel a lohching leh nuamsa i sakte maban ding tuh achizau huai hi. Jawlnei laibu in Pathian mizia diktak tuh gilou muhna dinga a mit chiimzaw, hoihlouhna ensim theilou ahihdan agen hi (Hab 1:13). Thilhoihlou hihte dingkhia in mihing lam ah dinmun hoih pipi ah om mahle uh, vaihawmna a pelthei keiding uh chih hon sinsak hi. Pathian in hunta chia a gamtat hun dohzou taka ngakding in hon kawkmuh hi. Sam gelhtu in 'Gou a kholkhawm ua, aluah ding lah a theikei uh' (Sam 39:6) achi ahi. Pathian in a vaihawmna Chiang alik hun om ngeingei ding chih kimu hi. Ginomtak a Pathian buan leh ngak teitei mite tuh Pathian in dawnna deih huaitak a pezel ding hi. Tuni'n Khrist a gingtute tuh ginna ahing dingte (Hab 2:3) ihi uh. Lametna toh amuang ngamte Pathian in vuaksuak sak ngeilou chih thei in aw.

GINGTU HINKHUA APAN ETDAN: Mi tengteng pom theih ding a genchian ding chihlam hilou in. Gingtute thugin bulpi apan et in thuakna leh haksatna i tuahte himhim 'divine plan' ahieh mangngilh louh ding ahi. Sa leh gal omlouhna khovel a om i lunggulh naklai in galpi huham tak kimaituah lellel in tuni tan inleng i maban ding uh suangtuah haksas mahmah lai hi. Kial leh tak banah sa leh gal in bangtan daih in bang dinmun in i dingdia chih kithei zoulou hi. Mihing damsan tuh nopsakna leh kipahna kia hilou in. Pathian theihna a hizaw chih mangngilh louh hatna thuguk ahi. Haksatna kichite Pathian in amah toh kinaih semna dia a vanzat manpha ahi thei hi. Kumpi David in 'Na thusehte ka zil theihna dingin hih haksat a om kei a ding in a hoih hi' (Sam 119:71) a chi a. A genzelna ah 'hih haksat a ka omma in ka vakmang naknak hi' (Sam 119:67) chiiin a gennawn hi. Hiai khovel tuh Pathian 'playground' bang maimai a hikei a, tangtawn gam lutna dinga ground poimoh tak a hizaw chih leng theih a poimoh hi. Thuakna leh haksatna kichi a om a, hiai te ziaka Pathian tunga vui in

omzia a neikei a, haksatna hon pumpelsh sak tuankei hi. Pathian ginglou miten athawn in a thuak ua gingtuten bel lametna toh i thuakzel uhi. Tuin gingtuten bangkim theichian kei mahleng mihingte thuakna khenlam ah Pathian om a hihdan hon muchian sakzel hi. haksatna kichi a hoihlan suaksak theitu Pathian hing neite ihi uh. Sam gelhtu inleng hiai khovel ah haksatna a hau chih amuh theih hi. A ki hehnepna thu hichiin a gen a, a mau neih leh lam muang a, a mau hauhna suangte'n Pathian kiangah a unau leng tatna piaksak theilou ding ahih dan a genkhit in 'Mipilte asi ua, huai bang in, mihai leh mimawlte leng a mang tuaktuak ua, a neih leh lam uh midangte a nawtsiat zel uhi' (Sam 49:10) achi leltak hi. Mi tampiten khovel tuh i tangtawnmun ding bangzen a ngaihtuahna nei in, i inn leh loute leh mun leh mualte suan tengteng tan a omding bang in i ngaikha uh a hiding. Sam gelhtu mah in "A gamte uh a mau min mah a tamsak uh' (Sam 49:11) a chilai hi. I khopi sung ah vak leng indung tanlek asau lampi omsunte leng 'ei mah min mah i tamsak siuhseuh geuh uhi'. A sia chia dempumpi ka hipah

kei a, khovel ahihdan hon theisaktu lel hiin ka ngaihtuah hi. Himahleh Laisiangthou in zaw 'a sih Chiang in bangmah a kengkei ding hi; a thupina in zuikhe louding ahi'(Sam 49:17) achi hi. Unau it gingtu hinkhua apan etin zaw khovel thupina i chihte kumpi Solomon in 'bangmah lou phet ahi' chih tuh a zohna ahi thouthou hi.

THUKHITNA: Ka nidang hun in valnou lungleng ka hi hia? Ahihkei leh kingaisia ka na hi hia? ka kithei zou kei! Singtang dawna solkha tang nuai ah Lengtong Pauno laphuah "Tulsing ka hizong, kei lim ah gual khawllou ding. Damtui ka hi zong sen gualin dawnlou ding a, Tunsung pan mimbang a ka pian sese aw' chia tingtang toh khitui kai phialphial zen a ka na sak hunte ka ngaihtuah kik Chiang in. Tua Pathian lam ka etnung adingin haihuai tak ahita chih ka muchian semsem hi. Pathian lam enloute adin khovel a mial ahi. Kum tamlou paisa a si Indian Bollywood minthang Sushant Singh Rajput suicide thu in ka lungsim honluah sek hi. Ama sih ma ni-5 vel in a manager leng suicide chih ahia, huan Sushant sihtu a zakchiang in Nagpur a om a fans te laka khat

kum-14 miin a na sihloh nawn hi. 'Bollywood' leh 'Celebrities' kichite tuh khovela mi nuamsa leh kipakpen ding a lamette ahi uh. Himahleh Pathian tellou hinkhua zaw a hawm lel ahih manin hichi ahita ve!

Tuni in beidong na kisa hiam? khovel sahkua tuamtuam te sahkho laibu the Vedas hiam, Bhagavad Gita hiam, the Quran leh Guru Granth Sahibten a gelh louh uh Jesu' kampau a om a huai tuh 'Nou semgim leh puakgik paw tengteng aw, ka kiangah hongpai un. Ken khawlna kon peding' (Matt 11:28) chih ahi. Jesu chialna theilouten zaw a zohna bawldan uh a chizauhuai hi. Bangchizah takin Habakuk khasia kisa mahleh, a zohna tuh a hoih in a ngaihnuam petmah hi. Nidanga a sinsakna leh kampau omsa tengteng sang a manpha zaw ahi diam chih theih khop a lungsim khoih tuh "Theipi kung pakpha lou in, Grep guite a gah omlou in, Oliv sepgimna vuaksuak in, Loute'n nekding piangsak louin; a huang kipan gan honte satkhiak himahleh; Huchipiin leng Toupa ah ka kipakdinga, ka hotdamna Pathian ah ka nuam ding hi (Hak 3:17-18)" achih thu ahi. Mihing khut nasepna teng

vuaksuak in, huangvulh ganta ah lohsapna tuakzel mahleh, Pathian a kipumngak topna tuh a hatna ahi.

Tulai in hun haksa tak ah, gentheihna leh kialna in i insung bangkua hong vehlai in na kingaisia in Pathian na mohsa kha hia? Sepding mu leh mu zoulou kal kigamla tak khovel ah i om lallel uhi. Mi tampiten nek senglough home made nek theih lim taktak a nek lai un, Inkuan tampiten zing ading zinga zongtawm, nitak a huan ding nitaka zongtawm ki om khading hi. Khovel leh sorkar lamah lamet ding a tawm chih gentaklough omlou himai hi. Eisung diakdiak bang tuh pawl tuamtuam leh thilhihthei kisa i hauh thoh maimah ua lah... a banzaw gensau nawn dah ni! Hichibang hun haksa ah om mahleing, jawlnei Habakuk banga Toupa i hotdamna Pathian a kipahna tuh i hatna thugui ahi. Hinkhua haksa sak ziaka 'bang hang hiam Toupa aw; bang hang hi hiam?' chia beidong kisa a, taldom zen a lungngaihna in a kaihkun i om uhia? Jawlnei Habakuk bang in Toupa lam en a theihshiamna nei dingin a Khasiangthou in hatna honpia hen, Amen. ■

BIBLE STUDY



Pastor Khamkhanchin Ngaihte, Local Pastor, EBCC Zion

Text : Ephesate 3:14-21

Thupi: EPHESATE ADING A PAUL THUMNA

Thumasa: Khovel tui kihawt in a langlang ah hon tuah mahleh Pathian muanhuai in tuni tan hon kem a, September kha bang i tungtou ta. Kum leh hunbite tung a thuneitu Pathian min i phat ahi. Kha masa in bung 3:1-13 ah Pathian' thuguk, Jesu Khrist a Juda leh Zentel kipumkhatna leh huai thuguk/thusim kisel puanzakna nasep a Paul kihelna thu ina sin uhi. Tukha in Ephesa a gingtute ading a Paul' thumna i sinkhawm ding uh.

Ephesate 3:14-15 Paul' Thumna Pa: Pathian "14Huaiziak in, I Toupa Jesu Khrist Pa ma ah ka khukdin hi, 15lei leh van a inkuan chiteng min phuahkhiakna pa..."

HILHCHETNA: Paul in bung 3:1 a a zatsa thumal hon zang kiik hi. English ah "For this reason" aki zangtuak a, ei Bible ah "Hiai ziak in" leh "Huaiziak in" chiin a gen a, a gen kibang ahi. Hiai thumal kingakna bung 2 a gingtute dinmun thak kigente ahi. Gingtute "Khrist tawh hihhin a om" (2:5), "a khutsuakte" (2:10), "zin leh leng hinawnta lou in, misiangthoute toh tualsung khat leh Pathian inkuanpihte na hita uhi" (2:19), "sawltakte leh zawlneite suangphum tung a lam na hi ua" (2:20), "Kha a

Pathian tenna ding a lepkhawm na hi uhi" (2:22) chihte ahi gingtute'n Khrist a hamphatna i tante uh. Hiaite ziak/pansan mah a Paul leng Ephesa a gingtute sik leh tang leh amau a ding a Pathian kiang a thum ahi. A ta i hihna suang a A kiang a i thum ding mah ahi.

"Ka khukdin" (*I bow my knees*). "Khukdin" in kipiaklutna (*submission*), kingaihniamna (*humility*), zahna (respect) te a ensak hi. Ei sang a thupi zaw leh lian zaw khat ma a i om Chiang a omdan/lungput genna ahi. O' Neal Saddler, US a police officer khat, Black Lives Matter Movement hatlai a, protester te tawh khukdin khawm dia a nget lai un, ama'n, "na kiphinna uh

ka hon theisiam a, himahleh, Pathian ma kia a khukdin ka hi” chiin dawng hi. Hiai ah leng Paul in, Jesu Khrist tungtawn kia a Pathian Pa chi a naihtheihna nei i hihman in, Ama ma ah kingainiam a khukdin in ka thum hi a chi. Thumna i chih hihtheihlough neilou Pathian ma a hihtheih neilou mihing panpihna ngetna, huhna ngetna ahi.

“lei leh van a inkuan chiteng min phuahkhiakna pa” chih in Pathian tungnungpen a hihna, amah sang a thupi zaw omlou ahahna taklang hi. “Inkuan” ichih Greek ah patera ahi a, “pa” ahiah Chiang in patria ahi. Thumal kinai mahmah lah a gen kibanglough ahi. Patera i chih suangtu bul kibang mi lom/hon khat genna a zat ahi a, hiai mun ah gingtu teng genna thumal leng ahi thei. “Van a inkuan” chih in misiangthou paimasate genna ahi thei a, Pathian’ inkuan i chih leitung kia hilou a, van tung a leng om (angel honpi te) ahiah genna leng hi thei hi.

Ephesate 3:16-17. Thumsakna: Sunglam mihinna hihhatna ding leh khanna ding. “¹⁶...a thupina hauhdan bangzel a, ama Kha ziaak a mihing sunglam a

thilhihtheihna a hihhat a a hon omsak theihna ding in. ¹⁷ Huan na lungtang ua Khrist ginna a a tentheihna ding in, a itna a noute zungkai leh kingakna nei a na om theihna ding un.”

HILHCHETNA: Tang 16 apan in Paul in a thumna gah dingte ahon gen hi. Tang 16 ah, Ephesa a gingtute a sunglam hinna uh Pathian in a hihhat/hatsak ding Paul thumna ahi. “Hihhat/hatsak” leh “thilhihtheihna” kichi thumal a gen tuam hilou a, Paul zatdan tangpi, a gennop kibang (synonym) ahi. “Hihhat” (strengthen) tawh kilehbulh thumal “lungkesak/lung liapsak” ahi. Hiai a hihhatna ding a vanzat tuh Khasiangthou ahi a, “a thupina hauhdan bangzel a” hihhat ding chih ahi. 1 Korinthte 4:16 ah Paul mah in, “...I pawlam mihing zawngkhal hiai hiai mah leh, I sunglam mihing pen niteng in bawlhak zel in a om hi” ana chi hi. Pathian hauhdan akigen Chiang in a thupina leng uap kha a, huaimah tuh chiil hetlou in amah gingtute’n hamphatpih thei uhi (cf. Eph 2:4, 7; 1:6,17).

Tang 16 a Ephesa gingtute sunglam mihinna Kha a hihhat a a omna un a tup tang 17 ah Paul in hon gen hi. Huai tuh,

a lungtang ua Khrist a ten/mun a neih theihna ding ahi. A lungtang ua Khrist a ten Chiang in itna a zungkai leh lamtough in om thei pan ding uhi. Hiai tang ah Paul in gingtute khalam Khanna ding kalbi poimawh tak hon gen hi. Khristian hinkhua a khanna ichih itna a zungkai a, tunglam a kilamtouhna ahi a, huai pen Khrist in i lungtang aluah Chiang in thil hithei ahi pan hi.

Tang 18-19. Thumsakna: Khrist itna theihciamna leh Pathian bukimna a hihdimna ding. "...¹⁸misiangthou tengteng toh a zatdan, a sau dan, a san dan leh a thukdan theihchet theihna leh, ¹⁹Khrist itna theihphaklough, Pathian taangchinna chiteng bang a hihdim a na om theihna ding un."

HILHCHETNA: Tang 18 a tehna (measurement) thumal kizangte bang genna hi ding hiam chih tawh kisai ngaihdan tuamtuan a om hi. Himahleh, hihchiantute Hoehner, Skevington Wood, etc hihchetna bang in, Paul in a gennop pen tuh Khrist itna thupi leh za, mihingte theihciamna in a batlough, hihchet vual hilou zah dong a a thupina ahi. Tang 19 na "Khrist itna theihphaklough"

kichi mihing pilna tawh theihciamzoh vualloh Khrist itna genna ahi. Khrist itna mong neilou Ephesa gingtute leh gingtu tengteng in a theihchet ua, a theihciam ding uh deih in Paul thum hi. Theophylact in, "Khrist itna mihing pilna in a suikhiak vualloh himahleh na hinna a Khrist na neih Chiang in tua itna na theiding hi" chiin ana gen hi. "Ngou tui suahgiat laitui tang in, Tung a vanpi lai pek tang hen; Sing leh lou te laikung tang in, Leimi zata'n gelh chiat hen aw, Pathian itna gelh senglou ding, Tua ngou tuipi kang zong, Pathian itna gelh senglou ding, Tua tung vanpi bei zong." Hiai tehpih bei Khrist itna thupi hamphatpih a, tua tungtawn a Pathian' hoihna (moral character) a hihdim ahinding uh Paul thumna in atup ahi.

Tang 20-21. Thumna Zawhna: Pathian Pahtawina (Doxology). "²⁰Huan eimah a semzel thilhihtheihna bang in, i nget leh i ngaihtuah tengteng sang a thupi zaw tham hihtheipa kiang ngei ah, ²¹tangtawn in suan tengteng tan in, saptuamte leh Khrist Jesu ah thupina om hen, Amen."

HILHCHETNA: Tehpihbei a thilhihtheihna thupitak ziak a Pathian phatna tawh Paul in a thumna zawhna bawl hi. Pulakna a i gensa bang in, Ephesa bung 1-3 ah Paul in Jesu Khrist ziak a gingtute dinmun leh hamphatna te hon suut a, bung 4-6 sung ah tua dinmun thupi tawh kituak a niteng a hing ding a chouna thu hon gen hi. Huaiziak in, tu hun a Pathian thupina genvualllough hon taklang a, ahon gen thak nawn pen a hun tawh kituak mahmah hi.

Tang 20na a, “eimah a semzel...I nget leh i ngaihtuah tengteng sang a thupi zaw tham hihtheipa...” chih in, gingtute nget theih teng sang in leh a ngaihtuah theih teng uh sang in Pathian thilhihtheihna nakpitak in thupizaw tham ahihna gen uang hi. Khalam a gingtute taksap tengteng, a taksap teng uh sang mah a thupi zaw tham in Pathian in a pe thei hi. Paul in Pathian thu a suutna dan ah pumpi leh a hiangte khentheih hilou in pumpi khat ahi khawm uhi. Huai tawh kizui in, tang 21 ah, “saptuamte leh Khrist Jesu ah thupina om hen” chiin zou hi. Saptuam leh a lutang Khrist thiltup (goal) Pathian’

thupina ahi gige. Huaiziak in, Jesu Khrist leh a pumpi saptuam tungtawn a Pathian in thupina atan ding ahi mah ahi. Pathian thupina thilsiamte tung a itna pansan a taklat a om tawh kisai a saptuam in a kituak dawnna (fitting response) a piak theih omsun tuh a khang a khang a Pathian a biak a, thupina a piak ding ahi mai hi. Huai ahihziak in, Paul in, tuabang in hong hi hen (amen) chi in a thumna zou hi. I saptuam a Pathian’ thupina akilat keileh saptuam paidan leh kivaipuakdan velthak poimawh ding hi.

ZAWHNA: Paul in hiai Ephesa laikhak Pathian phatna leh gingtute adia thumsakna tawh a pat bang in, tu in leng, Pathian pahtawina leh gingtute adia thumsakna tawh a khenpi masa zawhna bawl hi. Hiai a gingtute adia Paul thumna apan sintuak poimawh mahmah thum ka hon luikhia hi. Khatna, gingtu te’n Pathian thupina i phawk semsem a, tua tawh kiton a a thilhihtheihna thupitak tungtawn a i hinna a hon hihhatna dia i thum ding ahi. Pathian thupina/vangletna i phawk semsem a poimawh lua hi. I gam Khristian hinkhua a i taksap lian mahmah, khelhna

tampi samluttu khat tuh, Pathian vangletna ngaihdauna ahi. Nihna, Pathian hon itna lamdang i theihshiam a, tua itna mah bulphuh a nei a i Khristian hinkhua zungkai leh lamtough ahihna dia i thum ding ahi. Thumna, i

hinna pumpi tunga thunei pen Khrist ahihna ding a i thum ding ahi. Siit neilou a Khrist thununna nuai a iki piaklut a, ama deihna bang a hinkhua i zat ding ahi. Tuabang ding in simtu deihtakte Toupa'n hon vualzawl hen! ■



Gammial Aw

Toupa gamna sepna a thilpiak leh thumna a na pang gige saptuam mite i Toupa leh Hondampa Jesu Khrist min in chibai aw. Toupa gamna sem a field a Missionary-te tungtawn a i sepna in masawn zel ahihdan khateng report apan muhtheih a om zelte ziak in kipahhuai i sa hi. Eite thumna luangkhwamte'n tangthupha tangkoupih a kalsuankhia semtute naktak a thaguan ahihman in thupi leh manpha i sa hi. Tua ahihman in, Pathian gamna sepna ding a eilam apan i hihtheihna zahzah suah a naaktak a kisuuk a, panlak poimoh ahihdan hon musak hi. Field a semtute tungtawn a kal i suannate apan nna kistem omte leh Toupa'n field a thilthupi hon hihsak report tungtawn a i muhte hiai anuai a bang in enkhawm nawn ni.

A. HIMALAYAN MISSIONS FIELD

KIPAHTHU GENNA LEH THUMNA DINGTE:

1. Toupa'n field tungtawn a i nasepte a hunhun a gah hon pezel ahihdan i mu a, field a semtute kalsuanna tungtawn a gingthak 10 (Haldibari-6, Budhabare-2 & Ektin-2) hon piak nawnte ziak in kipahthu gen ni. Field a gingthak leh baptisna tangthak omte khalam kalsuanna ding khasiangthou makaihna ngetpih ni.
2. Field a semtute leh gingtute lak ah a chang in damlouhna tuak omthei zel mahleh sepna toh kisai subuaitu ding zen omlou ahihman in kipahhuai i sa hi. Tuni chiang in field ah douna leh dalna bangmah omlou a semtute'n semzom theizel ahihman un kipahthu gen ni.

3. Toupa gamna sem a kalsuan semtu Missionary te'n khamangthang dingte veina leh lainatna toh naaksem a hon sep ua, khamangthang tamsem Jesu khebul a hon pilut theihna ding un thumpih ni.
4. Semtute'n a kalsuanna tungtawn ua Pathian thu lunglut a houlimpih theih ding leh maban a amaute houlimpihna a hon sutzop theih zel ua, houlimpih a omte a lungsim ua thukzaw sem a khasiangthou in nna a sep a, Jesu Khrist hondampa ding a hon saan theihna ding un thum ni.
5. Field sung a department tuamtuate leh Local level a tukum paille a sepsuah ding a field in a koihte hoihtak a hon sepkiak theihna ding un thumna ah delhzui ni.

B. DHEMAJI MISSIONS FIELD

KIPATHU GENNA LEH THUMNA DINGTE:

1. Semtute'n EBCC Lachangaon ah Tuition naupangte leh tuailai laisim lelte toh kithuahkhawmna Programme khatvei tuak neih ding a ageel bangbang uh gahsuah leh manphatak a zangzou thei ahihman un kipa~~th~~thu gen ni.
2. EBCC Namgharia a saptuam mamberte hundang a kikhop lunglut mahmah himahle uh khenkhat in ngaihsaklou in om uhi. Himahleh, a biakna ngaihsakloute leng Pathian in A misiangthoute thumnate hon dawng in, tu in biakna kikhop a kihel thei bangzah hiam om nawnta ahihman in kipa~~th~~thu gen ni.
3. EBCC Dimoroguri ah Pastor S Thangbiakmang khut tungtawn in Mr Soshi Pegu leh Reuben Taw te'n baptisna tang uhi. Kipa~~th~~thu gen in, amaute field a ding a gingtu muanhuai leh khuam poimoh tak hong hih theihna ding un thumpih ni.
4. Field in EBCC Dimoroguri tuailaite a ding a Youth Retreat neih ding a geel bangbang uh buaina omlou in neitheu uhi. Hiai programme ah kihanchiam thak leh Pathian pina muang a kalthak suan ding a kipia tuailaite ziak a kipa~~th~~thu gen in, amaute'n a thuzak bangbangte uh a hinkhua ua hon hinkhiakpih theihna ding un thum ni.
5. Field ah a vangkim in damlouna chi tuamtuan nei gingtute lak ah om hi. Amaute'n damna ngai mahmah ahihman un, semtute thumsakna tungtawn leh A misiangthoute thumnate a ngaihntat bang ua thumna tungtawn a hihdamna a tantheihna ding un thumpih ni.

6. Semtute'n September khasung in Amguri leh Morahuti ah mi bangzah hiamte chialkhawm a Pathian thu a houlimna programme neihpih sawm uhi. Programme vuaksuaklou a, manphatak a neih ahihtheihna ding in atel ding mite leh vaisai ding semtute thumna in delhzui ni.
7. Pathian thu lunglut Mrs Premolota Doley te insung ah Pathian khasiangthou in thu hon gen a, gingu hinkhua a hong hin theihna ding uh leh kal hon suan theihna ding un thumpih ni. Ban ah, Garhpara a om, Mr Ukil Pegu leh a innkuante counselling piak a omte'n a ginna uh hon taksuahna ding un thumpih ni.
8. September 03-06, 2024 sung field pumpi huap in Papi Gospel Camp neih in om ding hi. Thugen in Pastor S Thangbiakmang leh Evan H Jamkhanmang te kizang ding uhi. Thumna ah phawk ni.

C. HOJAI MISSIONS FIELD

KIPAHTHU GENNA LEH THUMNA DINGTE:

1. Hojai Field ah Toupa'n thil thupitak hon musak a gingu innkuan nih leh tangval nou khat hon piakte ziak in kipahtu gen ni.
2. Pathianni chiang a semtute'n biakkhawmna a neih zel uh tuni chiang dalna omlou in pathei zel kipahtu gen ni. Gingtute biakkhawmna hun a ginglou mi a kihel zelte'n Pathian hing hon muh theihna ding un thumpih ni.
3. Naupangte lak a Home Tuition tungtawn a tanchinhoih chii tuh ahihtheihna ding a panlakna pailel hong vuaksuaklouh a, gah manpha hon suahna ding in thum ni.
4. Hojai a Meitei lak a semtute'n sem ahihman un, Manipur namkal buainate ziak a nawngkaina a omlouhna ding in thumpih ni.
5. Lanka station a semtute'n Pathian ompihna toh A gamna semzom theizel ahihman un kipahtu gen ni. Semtu omte'n a omna uh station thak ahihman in, tulai tak in a khomite toh kilawmbawl theihna ding om thei bangbangte ngaihtuah in panla lel uhi. Pathian ompihna toh a kalsuanna uh hong lamzan zel a, gahsuah kalsuanna hong hihtheihna ding in thum ni.

D. GOALPARA MISSIONS FIELD

KIPAHTHU GENNA LEH THUMNA DINGTE:

1. Semtute'noudaltu omlou a tuni chiang A gamna lam tuamtuam a semzom theizel ahihman un kipahtu gen ni.

2. Field a semtute'n First Aid Project nasepna a neih uh maban a Free Medical Camp, Primary Health Centre-te toh pangkhawm mah a saizom a sawm uh buaina omlou a lamzangtak a hon sepsuah theihna ding un thumpih ni.
3. Field a innkuan nih omte'n Pathian deihna bang a kal hon suan ua, ginom leh muanhuaitak a theihpihna nna hon sepzom zel theihna ding un thumpih ni.

E. KAMRUP DISTRICT, ASSAM

KIPATHU GENNA leh THUMNA DINGTE:

1. Semtute'n hihbuaitu bangmah omlou a Ministry lamzangtak a neitheih zel ahihman un kipathu gen ni. Pathian thu a houlimpihsa a neihte uh buaina omlou a hon sutzop zel theihna ding un thumpih ni.
2. Evan Kamkhenthang, Dhupdhara Station pansan a semtu in Dhupdhara Football Academy-te lak a a kalsuanna sunzom theizel kipathu gen ni. Hiai Football Academy tungtawn a mite toh kitheih tuahna leh kichimat semna hong om a, tunung a tangthupha genna ding a kong hon honsaktu a hihtheihna ding in thumna toh delhzui ni. Ban ah, naupang coaching piak a omte tungtawn a anu-le-pate uh toh kal kizopna hohtak a omna ding in leng thum ni.
3. Bamunigoan station pansan a semtute'n Agsia, Lampara leh a kimvel a khuate ah Ministry neih ahihtheihna ding in naktak in panla lel uhi. Hiai area a mite lungtang Toupa'n a hon honsakna ding in a gam mite leh semtute thumna in delhzui ni.
4. Loharghat Area pansan a semtute'n Mr. Aphullu Tanti leh Mr. Romen Rabha te kiang ah tangthupha chi tuh theih panpanta uhi. Kipathu gen in, amaute lungtang a tangthupha chi tuh a omte hong taksuahna ding leh Mr. Prokanta Rabha leh a innkuanpihte kiang a tangthupha gen sutzop theih hong hih a, amaute'n Jesu Khrist a hondampa uh ahih dan a theihna ding un thum ni.
5. Loharghat mun a gingthak Mrs. Rosmi Rabha leh a innkuante Khrist a ding a nungzui ginom leh muanhuai ahihtheihna ding un thumna ah phawk ni.
6. Pathian in Rabha mite lak a tanchin hoih gentheihna ding kong a hon honsak nang in thumni, chidam leh thathou tak a sep theihna ding in.

E. EBC MISSIONS CENTRE, GUWAHATI

KIPAHTHU GENNA leh THUMNA DINGTE:

1. EBC Missions Centre, Guwahati pansan in Rev G Thangsanglian, Field Coordinator in Assam sung a field tuamtuamte leh station i neihte Pathian ompihna toh innkuan chidamtak a enkol theizel ahihman in kipahtu gen ni. Pathian kha ompihna toh mohpuakna a neihte chidam leh lamzangtak a hon sepzom zel theina ding in thumpih ni.
2. Evan Suanboy Vualnam leh Pastor T Pauzalian te'n EBC Missions Centre pansan in semlel uhi. Amaute'n leng mohpuakna piak a om bangbangte chidam leh thathoutak a hon sepzom theih zelna ding un thumpih ni. ■

EBC DORKA KHAWMPI LIAN - 43VEINA

Thupi "Kipumkhatna" Eph. 4:3

- THUGENTU DINGTE:**
1. Rev. Dr. S. Vungminthang, *GS/EBC*
 2. Rev. K. Kamchinkhup, *Director of Missions, EBC*
- SEMINAR:**
1. Mrs. Lalhimpuii, *Associate Professor Education Dept. Presidency College Motbung, Manipur*
 2. Mrs. Vungkhawlching, *Accounts Officer, EBC*

Amun | Gospel Centenary Hall **Ahun** | 13-15, 2024 September

EBC LAMKA NORTH DIVISION Dorka Khawmpi 13veina

Thupi : Kipumkhatna (Eph. 4:3)

- THUGENTU:**
1. Rev. Dr. M. Khamkhanchin, *DS*
- SEMINAR:**
1. Dr. Kimboi, *Sr. Specialist*
- Thupi: Damtheihna leh Siangthouna**

Ahun | September 7- 8, 2024 **Amun** | EBCC Bungmual

EBC Lamka South Division | Missions Khawmpi - 15veina

Thupi : Khovel Vakna Na hi Uh" Mat. 5:14

- THUGEN DINGTE:**
1. Rev. Paukhanmang Guite, *EBCC Hebron*
 2. Rev. M Zalian Guite, *DS/LSD*

Ani | September 7-8, 2024 **Amun** | EBCC G Mualkawi



DORCAS *Corner*

Thilhoih hih a thilpiak hau ding a hon makaih zel Hondampa Jesu Khrist min in itna chibai k'on buk hi. Dorka Pawl in eimah mun chiat ah Pathian gam nasepna lam chituamtuam ah i sem uhi. Tualsung, Division leh Headquarter tan a i sepkhawmte uh kim sipsip in taklang zoukei mah le'ng khenkhat i taklang ding:

1. Pathian hehpihna toh CDSC in 2023-2024 Financial Year sung a sepsuah ding a kiguang Pastor zite Seminar a paisa January 24 & 25, 2024 sung in lohching tak in zoh ahi. Hiai hun ah Resource person in Evangelist-te T Damkothang leh Upa Lianding Guite zat ahi. Amaute'n thupi 'Panpihtu Muanhuai' pansan in 'Inkuan kepna leh Midang toh kizopna' Seminar hun hon la uhi. EBC sung a Pastor zite 63 kihel thei uhi. A tel khate'n nuamsa in khalam leh salam a phattuampih a manpha a sak dan uh feedback zak a om man in kipahhuai petmah a program hiai bang a hon zatpih Toupa min thupi i phat hi.

2. **Women Of Excellence Conference zang a kuanna:** Heutute deihsakna ziak in SAIACS Alumni in a sai 'Women of Excellence Conference' SAIACS CEO Centre ah 31 Jan – 2 Feb, 2024 sung Heutunu Chingbiakmawi toh ka vatelthei uhi. Khawmpi Thupi: For such a time as this (Esther 4:14) chih ahi. Resource person laisiam taktak leh mi kipezou mahmahte'n thugenna hun leh breakout sessionte makaih ua, nuam kasa petmah uhi. Resource personte kipiakzohna, anasepna mun uh Khristian loute lak a leng hangsantak a thudik a pang tenten ahihdan uh hon gen un lungsim hon khoih mahmah hi. Pathian in mohpuakna hon piak dungzui a a hon koihna munmun a amah min thupina ding a hangsantak leh theihtawpsuah a panding lungput toh tha hon guan uhi. 4th February, 2024 (Sunday) in EBC, Bangalore a Saptuamte toh hun manphatak zangkhawm in sharing hun heutunu Biakmawi in zang a, thugenna hun Nemngaih mawi in zang hi.

1. Central Dorcas Sub Committee saina in 31st May-1st June, 2024 sung “NUMEI MANPHA” Lehleng Camp Centenary Hall, New Lamka ah kinei hi. Hiai hun a camperte special tak nungak upa leh nuthawite Lamka North & South Division sung ate mi 115 vel tel uhi. Thugentu in Heutunu Miss Sangching leh Miss Liankhoman kizang hi. Pathian Kha Siangthou in hon ompih mahmah a Hotdam kitheitel leh khalam hinkhua kipuahpha thak ding in mi bangzahhiamte’n khut lik uhi. Toupa min phat in om hen.
2. EBC, Dorka Pawl in kumthum hal a Khawmpi Lian i neihzel tukum in Dorka Khawmpi Lian a 43na heutute phasakpihna toh CDSC makaih in Centenary Hall ah 13-15 September, 2024 neihding a gel ahi. Hiai toh kisai in Pathian buan a thumna hun 27th July, 2024 in Dorcas Hall Meeting room ah zinglam dak 8:30 akipan in nitaklam dak 2:00 tan kinei hi. Pathian Kha siangthou ompihna toh hun manphatak in kizang hi. Hiai ni mah thumna hun zoh in Dorka heutu masa Nu Niangkhodim leh Nu Chiinliante vehna kinei hi. Amaute leng a chidam ua, hoihtak a houlim thei in kipahhuai mahmah hi. Amaute a dia thumsakna hun zang in kipaktak in Toupa ompihna toh hun kizou hi.
3. Lamka North Division, Division Dorka Pawl in amau bial sung teng siksuak ding in vaiguan bawl uhi. Group 3 a kikhen in 2nd August, 2024 a kipan in 25th October, 2024 tan a zoh ding gel uhi. Khua veh hun a thugen ding in Heutute Miss Liankhoman, Miss Dimzangai leh Nu Thualkhoching kizang ding uhi. Tuabanah Division Dorka Pawl Khawmpi 7-8 September, 2024 sung EBCC Bungmual Biakin ah nei ding uhi. Hiai khawmpi hun in Rev. Dr. M Khamkhanchin DS, Lamka North in thugen ding a, “Damtheihna leh Sianthouna” chih thupi a nei in Dr. Kimboi, Sr. Specialist in Seminar hun lading hi.
4. Singngat Division, DBDC saina in ‘Makai Kisinsakna’ 29-30 August, 2024 sung Division a khochih Tualsung Dorka Pawl (TBDC) te paikhawm in nei uhi. Hiai hun ah Rev. Dr. V. Ginsianthang, DS Singngat Division sinsaktu in pang hi. Dt. 29th August, 2024 nitak in hunkhat Nemngaih mawi Dorcas Coordinator in zang hi. Kisinsakna manpha in a telten phattuampih uhi.

5. Lamka South Division, DBDC saina in Division Dorka Khawmpi a 10veina August 10-11,2024 sung EBC, Gospel Centenary Hall, New Lamka ah nei uhi. Hiai Khawmpi ah Thupi “kipumkhatna” zang in Evan. Lianding Guite thugenpi in pang hi. Seminar Thupi: 1. ‘Khristian Numei Gamtat Khoheidan Kisinsakna’ heutunu Miss Dr. Niangsangching in nei hi. 2. Thupi: ‘Damtheihna leh Sianthouna’ heutunu Dr. Priscilla Biakhoih in sinsakna nei hi. Khawmpi Pathian Kha siangthou ompihna toh lohching, gahsuaah tak a zatzoh ahi a thupina Toupa i pia hi.

6. EBCC, Bethlehem Tualsung Dorka Pawl in Tualsung Dorka Khawmpi 2nd & 3rd August,2024 sung thupi, “NUMEI TOUPA LAUDAN SIAM’ chih zang in nei uhi. Hiai khawmpi hunsung in Upa N. Lalginian leh Upa T. Lianchinpau ten thugenna hun zang uhi. Seminar thupi, “SALAM LEH KHALAM A NUMEITE CHIDAMNA” chih zang in Dr. Didim Guite Co-Founder, People’s Health Foundation Centre in hun zang hi.

Project toh kisai:

1. **Dorced:** Tukum 2024 a Dorka Pawl Project Dorced nuai a naupang chawm Class X & XII Board Exam te result a, HSLC Exam mi 11 lak ah 10 in passed ua, khat in fail hi. HSSLC Exam mi 9 ten passed vek uhi. Amaute lohchinna tungtawn in i sepgimna te uh Toupa ah a thawn ngeikei chih i muh ziak in thupina tengteng Pathian i pia hi. Amaute kipahpihna leh thumsakna hun dt.13/06/2024 (Friday) in Mini Auditorium ah vaiguan bawl ahi. Rev. Thawndoulian Director of Ministries in hasotna leh thumsakna hun zang in kipahthu genna Rev. Nenglian Vualnam Director of Development in nei hi. Naupangte kipahpihna in pawlsawm zoute mi khat ah Rs 1500/- chiat kipia a, pawl 12 zoute Rs 2500/- chiat kipia hi. Tuabanah subject a siam tungtuanna leh mark 80 apat tunglam mute kiang ah Rs 1000/- piak behlap ahi.

2. **DOTPROJ:** Puankhuina toh kisai in Batch gukna te graduation hun dt.15/3/2024 (Sintawpni) in kinei hi. Hiai hun ah Certificate Rev. Nenglian Vualnam Director of Development in piakkhiakna nei hi. Graduate-te kiang a puankhui khawl piakkhiakna Rev. Dr. S. Vung Minthang GS, in a neihzoh in hanthawanna leh thumsakna nei zomngal hi.

3. Dotproj batch 7na ah mi 14 in puankhui sinlel uhi. Kha 5na paila a, khenkhatte'n order leng khuitheita uhi. Pathian ompihna toh sinsaktute kipiakzohna leh sintute gin-omna banah kuhkaltak a a pannate uh ziaak in mavang mahmah uhi.

Genthei tagahte huai a thilhoih sem ding a hon makaih gige Pathian kiang ah pahtawina tengteng i pia hi. Toupa gam a dia tamlou antangpham i piakte, pawlpi leh mimal a i pankhawmnate thawn ngeilou ahi chih phawk thakthak in thasiallow in semzel ni. Septheihlauh hun hong tungkhathei a hi. Semsem ni Toupa gam a ding in. Midangte a dia vualzawl na nak hithei chiat din Toupan hon vualzawl hen. ■



YOUTH *Corner*

Baptist Youth Fellowship Lamka South Divisionte kalsuanna khenkhat:

1. **TBYF omna khuate veh ding:** Program seh a om bang in May 5, 2024 in Tonglon (P) & (T) ah kipan a huchiin South Division sunga tuailai omna khua 27 te veh in; a tawpna July 4, 2024 in EBCC Elim Veng ah TBYF Elim Veng leh TBYF Bethlehemte toh hun kizangkhawm in khovehna kizou hi.
2. **DBYF Committee in fellowship neih ding:** April kha a ding in April 7, 2024 zingkal in DS Office Conference Hall ah memberte paikhawm in manphatakin kizang zou hi. August kha a pen leng August 25, 2024 in lohchingtak in kizang thei hi.
3. **TBYFte kivehna neihsak ding:** Division sunga tuailaite khat leh khat kinaihsem leh khandan kibanga khang a thathak kigotna leh kihanthawanna ding lametna ahi. DBYF in a vehtu ding leh veva om dingte kisehsak a, huai dungzuiin TBYF in sepkiakna amau lemtan hun bang in ana nei uhi.
4. **PROJECT: GOOD SAMARITAN:** Hiai project pen kumtawn a sepkiak ding a kiguang ahi. Tuailaite'n midangte panpih a itna nasep sem a banzaak leh damlou sisan poimoh a hon ngente piak

ding chih tup leh ngim a neia hiai project kipan lamzang takin a poimoh leh septheih bangbang a monitoring cell etkaina nuai ah sepkhiaik zel ahi. July kha tana nasepkhiaik dan ahihleh:

April kha in mi 3 adingin donorte tungtawn in sisan unit 6 kippa.
 May kha in mi 7 adingin donorte tungtawn in sisan unit 15 kippa.
 June kha in mi 3 adingin donorte tungtawn in sisan unit 7 kippa.
 July kha in mi 4 adingin donorte tungtawn in sisan unit 6 kippa.

Laisiangthou sim uangbawl ding leh laisiangthou pansan akitaitehna neih ding chih tup leh ngim a om bang in August 15, 2024 in Ebenezer Academy ah Written Bible Quiz neih in om a khua tamtak a kipan in tuailai 300 val paikhawm in hiai program leng manpha leh lohchingtak in kizou hi.

Division Khawmpi/Lapawl Meet leh Planning Session 2024 neih ding chih kiguang bang in tukha 20-22, 2024 sung EBC Gospel Centenary Hall ah neih dingin kisakkholhna kipanta hi. Hiai Khawmpi ah Rev Dr. S Vung Minthang, GS, EBC in “Youth and Missions” chih thupi pansan in kisinsakna hun zang ding a, Rev K Kamchinkhup, DMs. EBC in “Youth and Addiction” chih thupi pansan in kisinsakna hun zang ding hi.

EBC Lamka North Division Baptist Youth Fellowship in leng hongtung ding September 27-29, 2024 sung EBCC Moria, Pearsonmun Vengkhong ah Tuailai khawmpi 11na nei ding in nasatak in kisakkhawlna pailai hi. Hiai hun in kitaitehna tuamtuam sai ding ua, Rev Dr M Khamkhanchin DS, Lamka North Division in “Kipumkhatna” chih thupi pansan in thugenna hunte zang ding a, Bible Study in Rev. Gin Malsawm in 1Kor. 12-14 sung pansan in nei ding hi. Hiai hunsung mah in kisinsakna “Mental Health” chih thupi pansan in Ms Grace Ngainunmawi M.Sc (Counselling Psychology) pang ding hi.

EBC Singngat Division Baptist Youth Fellowship in hongtung ding September 6-8, 2024 sung EBCC Suangdoh a Tuailai Khawmpi a 44na zang ding uhi. Hiai hun in “Khrist a Kipumkhatna” chih thupi pansan in Rev Dr V Ginsianthang DS, EBC Singngat Division in thugenna hun zang ding a, Seminar ah “Namkal buaina ziaik a Khristian Tuailaite Mohpuakna” chih thupi pansan in Pastor Vanlalminglian Guite, EBCC Bualjang in sinsak ding a, zing

devotion ah Pastor P Hau Shoute, EBCC Mualnuam in la ding hi. Hiai khawmpi hun in kitaitehna tuamtuam leh kumteng a aneih jel uh Singngat Division Big Star kidemna leng om ding hi.

EBC Mizoram Division Baptist Youth Fellowship in hongtung ding September 20-22, 2024 sung EBCC Khawkawn a Tuailai Khawmpi a 42na zang ding uhi. Hiai hun in Rev S Thang Johnson DS, EBC Mizoram Division in “Kipumkhatna” chih thupi pansan in thugenna hun zang ding a, Seminar Pastor Khenthang Buansing, EBCC Tlangnuam in “Khristian Etiquette-Tuailai Khohei Gamtat kilawm” chih thupi pansan sinsak ding a, zing devotion ah Pastor N Pumsuanmung, EBCC Dinthar in “Khrist toh Kipumkhatna ziaka Tuailai Hinkhua Siangthou neihna” chih thupi pansan dinga, Pastor B Chinkhengoupau, EBCC Teikhang in “Khrist toh Kipumkhatna, Hinkhua Lohchinna Bul” chih pansan in sinsak ding. Hiai khawmpi hun in kitaitehna tuamtuam leh palai vaihawmna hun leng om ding hi. ■

Thu Tuamtuam

Kipathu Genna: EBCC BYF Dialkhai in Music System project a ka neih uh Pathian hoihna leh deihsakna ziaak in Keyboard leh Mixer neizou ka hih man un Pathian min ka phat uhi. Hiai sepsuah theihna dia tha leh zung leh panpihna honpia Saptuam mipite, DS Office leh EBC Headquarters tung ah kipathu thukizakna ah ka hon taklang uh. Pathian kia in thupina tengteng tang hen.

- **H. Mangkhansiam**

Chairman, TBYF, EBCC Dialkhai ■

CHIALPINA LOHCHINGTAK IN ZOU: Date: 25-28 July 2024 sung CES & BCD Lungchin Saptuam in Hotdamna Chialpi kinei hi. Evan. Lianding Guite in “Na Pianthak Ngeingei Ding ahi” John 3:7 pansan in Thugen hi. Chialpi gahsua “Naupang 17 leh Piching 8vel in Jesu Khrist Lal leh Hondampa in sang ua, Khalam kipiakhakna neileng om hi. Sum-le-Pai leh Thumna tampi toh hon panpih tengteng tungah KTZ tungtawn in kipathu kon gen uhi.

- **M Nenglianmang**

Headmaster, EBCC Lungchin ■

TONIC SOLFA SINNA ZOU: EBC Headquarterte deihsakna leh Lamka North Division panpihna in Date Aug 1 - 7, 2024 sung EBCC G Mawnglian ah Thangbiaklal Valte, Music Promotor in Tonic Solfa sinsakna hong nei hi. Hiai hun ah sintu Tuailai 28 leh Naupang mi 46 in sin uhi. Solfa sinna hoihtak leh manphatak in kizou a, KTZ tungtawn in kipahtu ka hon gen uhi.

- **Upa Letkhokam**

Secretary, TBUC G Mawnglian ■

LOH LAKMASAKPEN PIA: Dr. Thangson Songput in Doctor a zilna zou in, Internship a sepna ah Stipend amuh masak pen Pathian gam nasepna ding in EBCC Bethany Saptuam phungvuhna ding in 28/7/2024 in pia hi. Toupa van Pathian in ama pi in Doctor lohching leh gahsuah Pathian misiangthoute adia belhtak hithei gige ding in Vualzawlina tamsem in vuk hen, chih ka thumna uh ahi.

- **Upa K. Thonzakam**

Secretary, TBUC, EBCC Bethany ■

LOH LAKMASAKPEN PIA: Mr. Pumkhansiam s/o Nu Lianzaching in a sepna SBI PO ah a khaloh lak masakpen Pathian gam nasepna ding in EBCC Bangaluru Saptuamte kiang ah hon pia hi. Toupa van Pathian in ama pi in a sepna ah lohching leh gahsuah in a vualzawlina tamsem in vuk hen chih ka thumna uh ahi.

- **Upa T Thangkhanmung**

Secretary, TBUC, EBCC Bangaluru ■

SAPTUAM' INN HONNA LEH LATNA: EBCC Bukpi in hun bangtanhiam a bawl uh Saptuam Inn Rev T. Thangzasiem, DS/EBC Thanlon Division in July 28, 2024 in honna leh latna nei hi. Local Saptuam sung a Departmentte pangkhawm a a bawl uh hi a, hiai inn zatna ding deuchte: Meetingna, Christmas leh Kumthak lenkhawmna, Computer room leh poimoh bangbang a zatding ahi. Amau leh amau kitoudelh a a lam uh hi a, Rs 3.5 Lakh vel seng uhi. ■

LOH LAKMASAKPEN PIA: Unaupa S Zamthianhau s/o (L) Chalbuang EBCC, Kawlbem in Government High School Kawlbem ah Teacher mu a, khaloh masapen Saptuam ah kipahthu genna in pia hi. A kipiak zohna thupisa mahmah in KTZ ah ka hon taklang uhi. Pathian in a sepnua vualzawl zel hen aw.

- **Upa M Chinsianthang**

Secretary, EBCC Kawlbem, Mizoram ■



Ordain Sunna

1. Min: **UPA N. THUAMSON**
2. Pianni: July 09, 1940
3. Pianna Khua: Bukpi khua
4. Pa Min: Pu Lutkai
5. Nu Min: Nu Saining
6. Zi min: Mrs. Chiinniang
7. Kitenni: 1968
8. Gil a gah goutan neihzah: 7 Pasal: 2 Numei: 5
9. Tulel a omna Saptuam: EBCC Bethany.
10. Tulel a kizatna: TBUC Member
11. Ordain Kum: January, 1981 Ordain Petu: Pastor Liankhoshyam
12. Pahtakna lai san kum: 2010
13. Toupa kiang a tawldam ni: July 24, 2024 Vui ni: July 25, 2024
14. Vuitu Pastor & Saptuam: Pastor B Kamkhansawm, EBCC Bethany
15. Natna: Teknat (Taksa hatlounhna tuamtuum le nei)
16. A tanchin gelhbeh tuakte:



Kum 1966 vel a pan Missions Teacher na sem in Kaihlam, Sinjang, Dailon leh Palkhuangte ah semkha hi. Palkhuang khua a aseplai in Grant in Aid ah kihei hi. Kum 1980 in EBCC Palkhuang in Upa dia telching in, Thanlon Division ah, a omsung in EBCC Bukpi ah local Chairman leh dinmun poimoh tuamtuum a lethkak banah Division Khawmpi Chairman leh DEC Chairman chihthe ah ana pangkha den hi. Amah mi kipe zoutak leh ahihna tantan a Saptuam leh Pathian adia kizang nuam gige leh taima mahmah ahi. Hatlou sasa aleng chiangkun toh Divotion hoh gige hi. Pahtakna lai sangmah leh Upa Committee EBCC Bethany ah phatuam ngaitak in a sihni tan in pang den hi.

Toupa Khasiangthou in a nutsiat a inkuan leh Saptuamte khamuan in makaih jelta hen. ■



Kipahthu Genna leh THUMNA DINGTE

SEPTEMBER 2024

1 NIPINI: Khathak hon musak i biak Pathian kiang a kipahtu gen in, Ama deihna bang a hunte i zattouh theihna ding in, A panpihna ngen in thum ni. Tuni zing leh nitak in EBCC B Kaljang ah Evan. N Thangsuanpau in Chialpina hun zang ding, thumpih ni.

2 SEPPATNI: Zingchiang apan 6 tan GBC Pricipal, Rev Gin Malsawm leh V Thanggoumang te ATA Theological Consultation & Annual General Body Meeting ah va kihel ding ua, date 8 in Pricipal in EBCC Bangalore ah hunzang ding thumpih ni., Delhi a NDPN hostel a UPSC exam ding a kisakhawl a coaching la lelte a ding in Pathian ompihna leh makaihna ngen in thumpih ni.

3 SEPNAWNNI: September 4-8 sung ESC, Santing Area in Khanglai Camp neiding a, Evan T Damkothang thugenpi in pangding. Pathian Kha pawlna leh makaihna ngen in thumpih ni.

4 NILAINI: September 5-8 sung EBCC Khazang in Numei lehleng Camp neiding a, Evan Lianding Guite thugenpi in pangding, camp lohching ahihna ding in thumna ah phawk ni.

5 NINGANI: September 7-8 sung EBCC Vengnuam in Makai kisinsakna hun zangding a, Rev Dr S Vung Minthang, GS in sinsakna makaih ding, thumna ah phawk ni. Zingchiang in

Evan N Thangsuanpau makaihna in unau tuambikna neite, Pathian thu leh la a kithuahkhawmna Pa N Thangkhangsong, Zoar Veng Bungmual ah nei ding uh, kithuahkhawmna manpha ahihna ding in thum ni.

6 SINTAWPNI: September 7-8 in Lamka North Division Dorcas Khawmpi 13na EBCC Bungmual ah omding. Rev Dr M Khamkhanchin, DS in Pathian thutak gending a, Dr Kimboi in “Damtheihna & Sianthouna” thupi pansan in seminar makaih ding. Khawmpi lohching leh gahsua ahihna ding in thumna ah phawk ni.

7 KIGINNI: Tuni in EBCC Jordan in Departmental Fellowship neiding a, Rev K Kamchinkhup, Director of Missions in sinsakna peding, thumna ah phawk ni. September 8 nitak in Rev K Kamchinkhup, Director of Missions in EBCC Bethlehem ah missions motivation hunzang in Thutak Ankuang lui ding, thumna ah phawk ni.

8 NIPINI: Dorka Khawmpilian 43na intek ding EBCC Elim veng leh vaisaipi, CDSC ten lamzangtak a vai a saizom zel theihna ding un thumpih ni. September 9-14 sung EBCC Lanva in lapu kisinsakna hun zangding a, Mr. Thangbiaklal, Music Promotor in sinsak ding, thumna ah phawk ni.

9 SEPPATNI: Dorka Khawmpilian 43na kisakkholhna pailel, gamla leh nai a kipan khawmpi zangdingte damtak a a tunkim theihna ding uleh hiai hun a tanmun neiteng in Pathian ompihna toh manphatak a a zatchiat theihna ding un thumpih ni.

10 SEPNAWNNI: September 10-12 sung EBCC Khokawn in Biakin thak honna leh latna hun zangding a, Rev Thawndoulain, Director of Ministries in Biakin thak hong in thugenna hun zangding. Program lohching leh gahsuahtak a zat ahihna ding in thumna ah phawk ni.

11 NILAINI: September 12-15 sung EOC Hill Town in Khanglai Camp neiding a, Evan Lianding Guite thugenpi in pangding. Camp lohching leh gahsuahtak a zat ahihna ding in thumna ah phawk ni.

12 NINGANI: Dorka Khawmpilian 43na September 13-15 sung Gospel Centenary Hall, New Lamka ah omding. Rev Dr S Vung Minthang, GS leh Rev K Kamchinkhup, Director of Missions thugenpi in pangding uh. Heutunu Lalhlmpuii in "Saptuam leh khotang a Khristian numeite dinmun" chih pansan in seminar makaih ding a, Heutunu Vungkhawhching in "Khristian numei insung mohpuakna leh sum zekdan" chih pansan in seminar makaih ding. Khawmpi lohching leh gahsuahtak a zat ahihna ding in thumna ah phawk ni.

13 SINTAWPNI: September 13-15 sung ZPCS Tuibuang in Revival Crusade neiding a, Evan T Damkothang thugenpi in pangding, Crusade lohching ahihna ding in thumna ah phawk ni.

14 KIGINNI: Dorka Khawmpilian pailel, Toupa pina leh makaihna i tante ziak a kipahtu gen in, lohchingtak a zoh ahihna ding in thum ni.

15 NIPINI: Pastor Candidate ten Mission fieldte leh Saptuam schoolte a exposure lohchingtak a a neihzoh utoh kiton in tu in Pastor assistant in semlel uh, kipahtu genkawm in maban hong lamzan zelna ding un thumpih ni.

16 SEPPATNI: WEC tungtawn a Pathian mission semkhe dinga kuante, kuankhe ding a kisakhawl lette leh Candidate Orientation a telte a ding in Pathian ompihna leh makaihna ngen in thum ni.

17 SEPNAWNNI: Saptuam in driver i neihte Dorcas Hall ah Khaisonmuan Guite leh B Liansuanzam, Singngat ah Siamdinglian, Thanlon ah Kapmung, Mizoram ah Isak, LND John leh LSD Khanlun leh GBC ah S Ginthianlal te taksa hatna, damna leh insung chidamna ding in thumpih ni.

18 NILAINI: Bethel Home Mission a semtu heutupa Pauven Ngaihte leh akep naupangte a ding in Pathian ompihna leh makaihna ngen in thumpih ni.

19 NINGANI: September 20-22 sung EBCC Suangdoth in Chialpi neiding a, Evan T Damkothang in Pathian thutak gending, chialpi lohching leh gahsuahtak a zat ahihna ding in thumpih ni. Hiai hunsung mah in Lamka South Division BYF Khawmpi omding a, Rev Dr S Vung Minthang, GS leh Rev K Kamchinkhup, Director of Missions thugenpi in pangding uh, thumpih ni.

20 SINTAWPNI: September 21-22 sung EBCC Ngazang in Hotdamna Chialpi neidng a, Evan Lianding Guite thugenpi in pangding. Chialpi lohching ahihna ding in thumpih ni.

21 KIGINNI: September 21-22 sung Dimapur Pastor Bial in Saptuam paidan kisinsakna neiding a, Rev Nenglian Vualnam, Director of Development in sinsak ding, manpha leh lohchingtak a zoh ahihna ding in thumpih ni.

22 NIPINI: NDPN toh kisai a Mission Inn, Khominthang pansan a laisim a omte leh enkaitu Evan Ginkhenmung Guite leh a inkuante ziak a kipahtu gen in, Pathian makaihna toh hong gahsuah ngeina ding un thumpih ni.

23 SEPPATNI: Rev Khaikhuphang OMF International toh sepkhawmna a Thailand a missionary, inn lam hongpha in saptuam tuamtuam ah report leh thugenna hun zangthei zel, kipahtu gen in, Pathian in manphatak a a zatzelna ding in thumpih ni.

24 SEPNAWNNI: Sa-le-Gal lak a dom himah lehang tuni chiang dong Headquarters Level, Division level, Local leh Missions Field-te ah na hoihtak in kisem tou theizel Pathian kiang kipahtu gen in Ama khut ah kikem tousak zelzel ni.

25 NILAINI: September 26-28 sung EBCC V Munhoih in Papi Camp neiding a, Rev K Kamchinkhup, Director of Missions thugenpi in pangding. Camp lohching leh gahsuah ahihna ding in thumna ah phawk ni. Zingchiang a kipan in October 4 tan in Youth Co-ordinator in EBCC Mumbai leh EBCC Chennai vehna

nei ding, vehna manpha ahihna ding in thumpih ni.

26 NINGANI: September 27-29 sung Lamka North Division BYF Khawmpi 11na EBCC Moria, Pearsonmun ah omding. Rev Dr M Khamkhanchin, DS thugenpi in pangding a, Rev Gin Malsawm, Principal, GBC in Bible study makaih in, Grace Ngainunmawi in Mental Health toh kisai seminar makaih ding hi. Khawmpi lohching leh gahsuah ahihna ding in thumpih ni.

27 SINTAWPNI: Tuni a kipan date 29 tan DBYF te saina in Lamka North Division sung ah Rev. Gin Malsawm, GBC Pricipal in Bible Study nei ding thumpih ni. September 28-29 in EBCC Vaikhotlang in Haithak lopna leh seminar hun zangding a, Rev Thawndoulian, Director of Ministries in thugen in sinsak ding, thumna ah phawk ni.

28 KIGINNI: Saptuam School a sem Evan Teacherte leh naupangte ziak a kipahtu gen in, Pathian pina toh ma honsawnzal theihna ding un thumpih ni.

29 NIPINI: Division chih in Mission khawmpi zangzou chiat ta, Pathian kianga kipahtu gen in, maban ah Division Kumsim Khawmpi kizang toulai dingte ah Pathian ompihna leh makaihna ngen in thum ni.


30 SEPPATNI: September 30 - October 2 sung VK Tawna High in Evangelistic Week zangding a, Evan Liangding Guite thugentu in pangding. School naupang tampi in Jesu Khrist Hondampa a honsan theina ding un thumna ah phawk ni. ■

BOOK POST

Postal Regd. No. MNP 07 | Regd. No. 22344/70

If undelivered, please return to

The Editor,
CHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India



VENG-LE-PAM TOH KIPUMKHTA

Thupiak poimoh mahmah zuih ding Jesu'n
hon sinsak ompen a taktak gam a sepsuah ding.

EXO. 20:16; LEV. 19:17-18; 1 SAM. 18:1-4; SAM 133:1; PAU. 9:29; 17:17;
PAU. 12:26; PAU. 14: 21; PAU 18:19; PAU. 27:10; PAU. 29:5. MK. 12:31;
ROM. 12:9; ROM. 12: 16-17; 13:9; 1 KOR. 10:24; 2 KOR. 13:11; GAL. 5:14;
EPH. 2:19-22; JK. 2:8; 1 PET. 3:8; 1 JN. 3:18.

Edited & Published by Rev. Dr. S. Vung Minthang for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006